

焦太史編輯國朝獻徵錄

焦太史編輯國朝獻徵錄卷之九十五目錄

山東一

布政使

萬觀

夏寅

陳振

劉士奇

參政

王晏

陳士啟

左璫

謝騫

李嵩

熊桂

張潛

王珰

史學

敖璿

仕環

馮敏功

叅議

賈恪

張繼孟

劉宵

按察使

石渠

副使

周鑑

張孟兼

彭鼎

鄭敬

王和

李惟聰

王臬

沈鍾

戴冠

羅循

韓廉

牛嵩

張鵬

陸錢

李日章

吳嘉聰

呂高

溫如玉

張應治

僉事

胡子義

崔碧

李彬

劉時敷

楊璣

張嘉謨

李紀

王燁

趙勲

金陵黃應登

全校

吳興茅元儀

錢塘徐象榘

刻

焦太史編輯國朝獻徵錄卷之九十五

山東一

布政使

山東左布政使萬公觀墓志銘 王直

公諱觀字經訓姓萬氏世爲南昌人南昌之族萬爲盛自五代以來多顯者公之曾祖德遠祖漢雄父偉皆不仕而皆以行誼重當時公自幼聰穎異常選爲邑庠生登永樂辛丑進士第 太宗文皇帝欲老其才而用之俾歸進學尋召爲福建道監察御史克謹憲度凡所治諸事無不當於理翕然稱爲賢御史

朝廷嘉之以所居官贈其父而封母李爲太孺人且
榮及其妻未幾陞嚴州知府嚴之民雖稱易治而亦
有弗馴者七里礮聚漁舟數百艘晝則漁夜則肆剽
竊行旅患之公乃下令凡十艘爲一甲各限以地使
自相守有所風竊者必連坐能改過者俾安業如故
不期月皆化爲良善水行露宿無復有警郡中多大
山田少民貧公巡行勸課山有可耕者聽貧民耕鑿
而俾富者助之民食以足郡學傾圯首出俸資率富
民新作焉諸縣學舍有弊者亦脩葺之增廣主員躬
自課勵學者亦爭奮以承公意由是舉於鄉會試於

禮部對策於大廷中魁選者相繼而出爲顯官嚴
先生祠久廢公復作之置像其中求其後人居守奉
祀事表節義恤孤寡歲造段匹多於他郡則請計民
力爲準而減之遞運船多而過使少歲治船爲民病
則請減其半地少蠶桑而絲稅多民弗便請以銀代
輸猛虎爲害禱于神而虎斃居三載除弊興利無遺
者及考績來京師吏部以聞詔賜誥命以寵之時
天下郡守拜賜者僅三人公爲首母太孺人無恙迎
至郡朝夕宰婦子備物敬養焉後以憂去郡人奔詣
上司乞畱不果度公服除豫上章闕下願復得公

爲父母衝發之民慕公者亦上章請之適有言平楊
要劇郡非萬某不可 詔遂以公知平陽會連歲歉
公私皆匱公篤於事神恤民歲屢有獲流亡未歸先
是百工赴役京師者皆後期工部下有司遣人送之
械繫如罪人有死於道者公憫焉後再遣時召而諭
之曰爾以匠藝當赴役而自取譴累人以惡人待爾
故械繫以苦之今我以善人待爾去爾桎械令自往
爾能誠信奉令乎衆皆懼曰謹如教無一人敢後者
堯祠廢公奏請新之芝生於棟或歸美於公公曰吾
知脩祠而已芝非吾事也滿九年考績公卿交薦陞

山東右布政使下車七日卽出視民瘼野有蝗督有司捕之且虔禱于神蝗遂息齊民素健訟牒訐填委公閱其尤者自治之餘以委理問計日疏決獄爲之清陞左布政使山東地連北京會有虜警民大恐公拊循慰諭日夜勞悴使且耕且守民賴以安然軍國百需皆趣辦其應務尤難未幾公邁疾猶勤事不懈踰兩月疾益甚貽書都御史洪公及諸同列曰觀不幸不得相與協力報國家諸公慎自愛洪公等聞之皆傷悼奔視問其所欲言公惟拱手曰永訣矣遂卒無一語及私景泰元年十月也享年六十四

山東布政使司右布政使夏公寅傳

顧清

夏寅字時正後改字正夫華亭人幼而岐嶷有巨人志日記數百言稍長益肆力於學正統戊辰擢進士景泰初授南京吏部主事日取羣經及百家言讀之發爲文章淵闊奧審脫去流俗自成一機軸聲稱蔚然由稽勲郎中拜江西按察副使專董學政其教以崇實學黜浮華爲本知人善鑒士經其賞拔者後多知名後文山祠葺白鹿書院修陶侃讀書臺以風勵後學江西人至今稱之陞浙江右叅政處州民有苦

虐政走聚山谷者招之不聽曰須夏叅政來乃可寅
懷至卽散還其家丙午進山東右布政敬簡以容愛
民節用有屬以興作者不聽曰勞而不怨乃可弘治
戊申二月卒年六十六寅平居以諸葛武侯范文正
文天祥自期待留心當世聞朝廷政令善喜形于色
或有他則不怍終日常耽論國家之勢在離合合則
安離則土崩今兩京并建其勢宜常合以制天下徐
州地連山東饑饉無聊宜在賑恤臨清乃南北咽喉
或暫梗焉爲害不小宜選大臣有望實者鎮守二邦
訓兵屯田示天下形勢廷議是之爲出白金四萬兩

賑徐州命都御史賈俊鎮臨清吳中旱饑有司莫以
告寅授書巡撫發廩二十萬石糶十萬石三吳獲以
濟他所論列若文廟禮樂之數正風俗立紀綱崇文
化作人才之類皆切于政本雖不盡用識者韙之平
生誠心直道無黨無援自筮仕爲郎二十年爲副使
十六年未嘗以淹屈降志嘗謂人有三可惜此生不
學可惜此日閒過可惜此身一敗可惜世以爲名言
所著有紀行集備遺錄政監東游錄史詠等書並行
於世

山東右布政使陳公振墓志銘 張邦奇

公諱振字時起別號主靜世居鄆之半村祖諱均得
隱不仕考諱叙仁以公貴封文林郎河南道監察御
史母謝氏封孺人公生而靜慧成童遊郡學有聲成
化甲午領鄉薦辛丑登進士授知吳縣陞河南道監
察御史福建按察司副使遭父母及大母喪服闋復
除雲南副使陞陝西苑馬卿尋患風疾乞骸骨章已
在途會有命徙官遂以山東右布政使致仕公歷仕
幾三十年官至二品致政之日室廬脩然疏櫺僅於
家居足不踰戶閭口不及時事姻親舊故鮮接其面

如此者十有二年以正德庚辰二月二十日終于正
寢爲見縣政平訟清門無私謁爲御史綜理畿內馬
政巡按江西山東皆著風采然不以語人親故莫得
聞其詳所上章疏子弟不及見其草草言而危行好
勝者莫與之爭明於界分以法度自防絲毫必執無
少假借于家于官哉如也而心迹不二始終不渝杖
且嫉者無所投其黨逆瑾竊柄方而而下以事之京
者多枕藉其門不肯者希恩澤而賢者所脫禍公起
家艱赴部貧無以饘謹惡其獨不往懷之未有以發

也後除雲南備邊使編修
京冒矢石折首獲醜
且公卿乃得還先馬卿

山東右布政劉士奇

順德縣志

劉士奇者龍江人也字邦正舉進士主事刑部錦衣
千戶陶淳枉法殺人言官請逮治不問士奇再請竟
法之轉員外郎議禮與諸臣伏闕哭諫杖不死遷
郎中山陝兩藩與有司訟奉命臨訊論如法出守
梧州梧州有關之征軍餽委輸時有奇羨士奇不爲
利民多竹舍失火延燒輒數十百家士奇患之表火
道度數家障以崇墉災乃止在郡七年超拜廣西左
叅政江西按察使有某甲者一家九人文致強盜幽
囚數年士奇鞠而釋之右布政山東以病乞骸骨歸

士奇廉家無餘貨或傳士奇常欲市蜺問其妻妻曰
何不書清字與之杜門八年卒

叅政

叅政王公晏傳

陳道

公諱晏字士寧鳳陽府盱眙人父諱成甫母葛氏當
元季隱處鄉閭間安貧饒善用能免于亂世公生而
岐嶷不凡稍長勵志問學不苟言動儼如成人我
太祖高皇帝選天下俊秀儲太學公以通詩經預列
既緣親老得告侍養之暇行業滋益用薦者拔縣學
訓導教人多有成就連丁二親喪洪武二十九年改
洛陽典史公持廉秉直不隕陞于權勢有中貴因事
過邑欲有徵求陵鑠吏民頗急公諭以理法勿聽廉

得其私裝將檢盤之其人欽謝以去河南司憲者以
其才能薦乃陞滋陽知縣公益自砥礪勞心愛人如
不及時憐邑有蝗爲災公齋戒禱天蝗不入境內
太宗皇帝御極之明年山東叅政戚公䟽公治狀遂
陞刑部郎中公執法平允獄無冤滯尋調儀曹被命
之江西督造海艘公嚴于統攝綜理有法用能集事
財費且減十之二三上巡守北京時東宮監國公
一日當封稱旨每召見輒賜太官酒饌未幾陞陝西
布政司叅政布政使嘗宴僚佐用聲伎爲樂公止之
不可乘間而出已而事聞連及于公與凡在坐者悉

繫京師法曹按治間俄有 內批特有公復任 東
駕召論之曰汝第去我意汝無他頃爲 上前陳之
耳其受知可謂深矣公在陝撫治民瘼弗亟催科以
秋糧後期左遷山西叅議滿九載始陞山東右叅政
時永樂二十年也公嘗督開運河濱岸有梁山泊者
在勝國時塋垣皆焚以巨石公悉取造梁庄諸閘其
事者初有難色公曰此非名賢其事不經無補風教
今先務爲急吾知紓民力耳邇卹其他耶公之謀事
向方而敢于爲義此類可見時擬公將有大拜適
仁宗皇帝在位踰年而上賓故未蒙倚用 宣宗皇

帝繼統又五年公七十旬有四矣乃乞骸骨歸鄉里無
幾終正寢公歷仕四朝餘五十年冰蘖之操有如一
日不蓄侍妾嘗言酒色財三者吾自保無惑所不能
排遣者氣耳然公之氣亦非世俗挾私以求勝者其
爲兩邑所至民德之如父母每去任則挽留不忍舍
至解脫衣靴以寓甘棠之愛嘗以先茔在八仙臺下
弗能日時展省命工繪卷置行篋暇輒披閱之其孝
思誠切如此

山東布政使司右叅政陳君士啟墓志銘

楊士奇

陳之先五代時大理評事諱暉自金陵徙泰和始爲泰和人自宋以來子孫蕃盛皆儒爲詩禮鉅族代有仕者由科目進者六十有一人而至士啟士啟諱雷旣以字行遂別字震之其曾祖文瑞元瑞金縣儒學訓導祖存道安遠縣儒學訓導父煥章號萍翁母蕭氏萍翁四子伯士瞻洪武壬子鄉貢進士興寧主簿仲士悅叔卽士啟季士勗士啟髫髻時已挺特克自樹立甫十歲從學興寧君習詩律已文采英發士

二日舉子業治易經與朋友論議能自立說不蹈襲
末冠鄉大姓延教家塾前輩與之辯析史傳寡所推
讓父坐累謫遼東中道喪其從者士啟聞之徒步走
萬里省侍歲餘置居室及共養百需咸備奉命歸侍
母及左士悅理家事時公府徃役悉論產之殷者陳
氏產在里中甲乙數士啟雖年少兄弟協力一心必
不肯墮人後時與寧亦坐累謫五溪治裝遣人東西
寧父兄者嘗接迹而奉母盡孝養既父兄皆代歸無
幾父卒終喪永樂元年興賢詔下邑大夫舉士啟
遂選中江西鄉試明年中禮部會試廷試賜進士

出身觀政左軍都督府時成國公掌府事得士啟歡
甚問暇輒就講論古大臣賢將所以事君使人之道
士啟亦樂爲盡誠禮遇加厚召入翰林爲庶吉士脩
永樂大典辯博明敏同列推其老成翰林編修周述
言于 朝陳士啟才行有爲有守超擢禮部祠祭郎
中授奉議大夫究習典章謹干職事呂震爲尚書屬
官諂附者率得近尹昌隆不爲諂附以罪去之卒擠
以死同列以是惴惴士啟獨任直道不苟徇或舉尹
戒之荅曰人各有命吾恭勤於職以聽命耳枉已媚
人以求容不能也呂雖惡之卒不能害丁內艱去服

闕還舊職無幾陞山東布政司右叅政士啟寬厚愛
民於事必盡心而襟宇闊達不察察以爲明不苛急
以責效待下常采其所能而舍其小過妖婦唐賽兒
惑衆爲亂坐失覺遠繫數月釋復職數行所部督從
賦不嚴期約民得自便故事集而不擾青州歲歉郡
具饑民之數 上聞 朝廷遣使偕士啟如數賑之
粟比至而饑民之數倍增使者再議奏俟報士啟曰
民命在旦夕若再奏俟報旬浹間餓死多矣請發奏
卽出粟脫有罪請自任不敢以累送獨具奏 朝廷
從之所至民有爭訟郡邑未決而伏馬首以訴者從

容數語理論之皆忙服三載考最 賜誥命授中大
夫高煦潛謀不軌稍覺士啟適至青州聞之募夜馳
歸語三司同具密奏罪人既得士啟從陽武侯兵部
尚書錄其餘黨撫安人民遂同御史給事中清理山
東諸郡軍藉之其姦者無所容枉者賴以直蓋爲人
果確爲政廉平循理而行無所矯拂未嘗務名而所
至其民愛之平居友于兄弟睦於親族處人和易愈
久而不變宣德六年八月卒于官春秋六十有六

山東叅政左公璉墓志銘

倪謙

公諱璉字世瑄姓左氏世爲江右南城宦族以明經
中永樂甲午鄉試登戊戌進士第觀政都察院辛丑
拜浙江道監察御史壬寅丁父憂起復改湖廣道正
統戊午陞廣東左叅議景泰辛未九載秩滿陞山東
左叅政癸酉以目疾乞致仕天順戊寅得疾終于家
公少聰悟好學甫七歲補郡庠弟子員成童母嬰疾
跼危徒跣走禱于華蓋山北及哀慟柴毀旣冠從鄉
先生御史聶宗尹受春秋經先生見其端厚穎敏曰
此吾鮑宣也以女妻之父嘗患背疽時年八十衆醫

莫療公已出仕喪耦適以續姻還乃禱于天願以身
代忽遇遠醫至療之獲愈人以爲孝感爲御史時嘗
奉命按治陝西平反寬滯繩糾貪墨風采甚著代還
受勅命進階文林郎封贈父母及室時都御史顧公
佐總憲臺綱振威望獨器待公凡疑獄難決者必以
屬之尋督處州銀冶趨利者衆恒美兵爭敘公痛繩
以法莫敢犯嘗有虎爲民害公捕絕之復奉勅考
察浙江官吏激濁揚清旌良斥暴輿論允愜其在廣
東時清理軍政姦僞莫官嘗往瓊屋招諭黎徒悉聽
約東漳潮寇發公以兵擒亂者者罪之餘皆釋去廣

寇黃蕭養勢日猖獗公卽率兵還討又往廣西徵兵
造船以禦之寇平與有功績滿復受誥命進階大中
大夫封贈如制其在山東時總督民賦公徵輸有藝
賦足而民悅甫二載謝事去其居鄉里比歲荐饑公
發粟以濟全活者甚衆鄉人德之公寬裕仁讓和易
可親以清約自持不爲斬絕之行歷官中外幾四十
稔所至興利除害惠澤在人每思世人飾誇辭而寡
實行因號訥菴以自厲所著有訥菴稿辭旨澁辭務
於析理又嘗編次晦菴刪定古文孝經及春秋旨要
藏於家春秋七十曾祖諱明叔元三公府從事祖諱

彬卿平樂州學正父諱彥彰贈監察御史廣惠府經歷
母周氏累贈恭人

右叅政謝壽傳

謝壽字鵬舉子之子器宇軒豁自幼警敏刻志問學
衆以大器期之正統戊午補邵庠生尋領鄉薦登進
士第拜河南道監察御史侃侃立朝務持大體督
察鹽課于浙江風紀大振無敢私販者有冢宰子弟
怙勢犯之悉置於法併劾罷其官君子壯之時處州
盜起奉朝命躬入賊巢諭散其黨與徐策擒其首
獻一方遂寧有文綺寶鑑之賜陞從六品俸尋陞漳
州知府至則以興學禮賢擊強暴束吏胥爲務復嚴
立保伍法責保首月報所轄生業及出以某事歸以

某時苟通番爲邏者所獲卽保首併四隣坐罪郡乃
無事考績爲八郡最屬邑并隣封官僚軍民恐逼去
郡赴部使者乞畱之至五千八百餘人丁內艱轉保
定知府嚴明果決吏畏民懷作興學校士風聿變陞
山東布政司右叅政益感激奮勵誓竭忠貞凡疑獄
艱務悉斷之釐之無不當人意者誥進中憲大夫以
疾力乞致仕歸恒持禮法自重非公事官府無一迹
日惟偕親朋陶情於山水之間暇則携子孫栽花種
竹以增園林之勝而已弘治壬子以疾終于正寢壽
七十有七

大中大夫山東布政司左叅政靜菴李公崧墓
表

張弘道

公諱崧字世瞻別號靜菴臨潼人高祖德曾祖昇昇
生祖恩忠思忠徙居咸寧生父某以公貴累贈中憲
大夫母張氏贈恭人以正統甲子九月生公卒弘治
甲子六月享年六十有一公生有穎資年十八克西
安府學廩膳生文詞勃勃莫之敢並大爲郡守余肅
敏公所重嘗贈以詩曾有向關中識白眉之句以書
經中成化乙酉鄉試己丑進士初除山西屯甯知縣
屯甯難治在主文弄法上欺官府下虐良善十數年

來獄訟錢糧皆出其手吏供使令官聽調發公至先
傳其主文按其奸弊得十餘人悉捶死而縣治始清
法令不擾強梁畏如神明良善親如父母在縣三年
一毫不取廉名四振官燭不點他可知矣至興學校
脩禮樂正風俗時婚娶治行爲天下第一陞戶部河
南司主事轉山西司員外郎卽中在部十二年除積
弊革奸猾錢穀出納一毫不爽一時居部者無出其
右名勅京師陞滿州府知府治滿州如治屯甯而法
令稍寬詞訟兵甲錢穀無不克舉賑荒救饑所活萬
餘人民不憂旱蝗不入境立侯馬之法定鹽鈔之價

制河橋以免民溺廣積穀以備賑貸撫按交薦聲譽
赫赫陞河南布政司左叅政去任之日婦女痛號百
姓遮道立碑頌德甲寅丁外艱居喪三年不出門戶
內旻服闋復除山東布政司右叅政未及丁繼母憂
復迴守制服闋將起而病作不起嗚呼惜哉公貌不
踰中人判大事決大疑重如泰山沛若江河有一介
不取之廉有萬方無敵之勇故近山銘公曰行不媿
影寢不媿衾近山與公同爲李介菴門人介菴關西
夫子也許襄毅亦嘗謂人曰人知李世瞻有伯夷之
清而不知有管仲之才當時以爲的論公於子不甚

教獨嚴擇女配人間之公曰人各有性心各有志非
教所能強也強之不從則害天性矣女配不良終身
怨焉故於平田既觀其行又試其藝曰公輔器也將
未必大成遂以女妻之今果然矣人以此服其藻鑑
云治道妻祖山東德府紀善田公銘於公爲姊夫嘗
述公之良治道得聞焉故知公之詳而表公之切觀
者幸勿與納賂而厚誣者同而弗信焉

山東左叅政熊公桂墓志銘

公名桂字世芳南昌之新建人也弘治戊午以書經
舉於鄉已未進士明年以父喪去服除授大理寺左
評事尋陞寺副寺正武宗初太監劉瑾用事以峻
法繩下嘗倚詔條凡藏匿軍丁罪及隣佑五六家
以肆羅織部屬承望風旨誣累嘗百數十人公建言
詔令權宜惟一時可行祖宗成憲則百世當守乞
毋輕變枉致冤濫上是之由是得免者以萬計厝
都御史欲殺一指揮非其罪公駁回五六次將聞于
上乃止瑾逆謀敗露黨與洶洶大臣慮有變促成獄

法司多出入瑾門下者不無觀望駭愕失措莫敢先
發公毅然承之不終夕成招盡得奸逆之情其外應
凶焰如宸濠亦不肯以親王少諱也嘗治安化王獄
其夜不收三千人擬同謀併坐家口公曰同謀幾事
也株連三千人且及家口慘矣力與辨明所活不下
萬人任凡六載巨細務在平反大率類此庚午陞徽
州府知府在直隸陟刑郡民剛好陽公下車一以安
養休息爲已任期年而政通乃節縮浮費修橋梁興
學校表忠節於教化惓惓焉姚源郝冠流劫婺源界
公焦勞于外多方禽禦徵得安堵治績燁然最東南

諸郡嘗得海翁紫陽書院舊址乃復于釋氏掄士學
行者唐臯鄭佐胡宗明鄭逮程旦戴鍊黃訓輩八十
餘人講道其中資以俵餘又買田千餘畝給祭祀及
來學者爲久遠計 國朝守令不握兵官軍又不得
擅調正統間設民壯爲守城計迄于成化又增添之
地方有警則徵發捕邏而有司驅迫又有不可勝言
者徽民甚苦之不肯就役公爲審丁糧定額役法至
今稱便時冗食日增內供白旗出蘇松常者勢不能
給誦謏聚飲之臣飛泝於徽又方新 乾清宮取材
於徽當浙之半公委曲曰上司至於涕泣得減其半

以蘇民困任甫三載屢下詔書旌其賢能進秩中
憲大夫推恩父母皆特馳封滿六年丙子陞山東叅
政微民不烈其去境上咸樹碑以志思慕至山東分
守東兗道一夕河決泛曹州兵備吳副使忽驚斃公
晝夜馳數百里往視之水勢甚暴乃齋沐臨河祭告
黜貪酷官吏數人水遂少定得築壑之嘗謁闕里惟
祭器不稱王祀度所費可千金會民有發地窖得錢
數百斗來報計之適足用遂命工鑄造規制乃備戊
寅督運至京師貴人歲常包攬利入本色以便侵漁
公力言于上得納輕糶省費不下數萬山東人咸

頌之未幾奔太恭人喪宸濠憾公作劉瑾招狀發其
陰謀幸公去遣賊悉焚其居第年五十有八公神氣
秀發狀貌豐偉學見本領故剛大之氣經濟之才雖
甚韜襲終莫能自晦也惜乎未躋大位而不盡見其
設施豈數果有短長耶抑世道之有升降人固莫知
其然也公在大理有駁稿在徽有治徽大畧及平生
奏疏詩文號石崖稿若干卷藏于家

山東布政司左叅政張公潛墓志銘

王九思

公張氏諱潛字用昭自號曰東谷其先河南太康縣人也乃以徂戍隸籍陝西岷州衛曾祖諱文信贈右副都御史祖諱善封右副都御史父諱錦官至刑部尚書左侍郎侍郎公後徙秦州公復徙華州定居焉乃今爲華州人母淑人劉氏生五男而公爲長生而穎秀清瑩如玉甫八九歲能日記數千言口占詩對答應如流稍長美筆爲文輒吐奇語侍郎公送之學士西涯李公所從受尚書李公奇之甚蓋嘗語人曰

韓退之驚惟張童子不易得也乃今復有張童子也
成化丙午秋公十有五歲矣西赴鄉試不偶乃益淬
厲自負不凡弘治壬子遠養楊公督學關中徧試諸
生謂關中有三才子蓋慶陽李獻吉洵陽張光世其
一公也其年秋三人同舉而獻吉發解云公再試禮
部而丙辰春自禮部入計大廷俱在高第其年冬
授戶部山西司主事出納錢穀關節不通剔抉弊竇
祁寒暑雨無少懈情部尚書稱其廉能秩滿三載吏
部考其績上上未幾擢員外郎辛酉侍郎公告終公
解官歸塋三年之喪畢改禮部儀制司員外郎正德

丙寅 天子新卽位將幸太學例遣官往召衍聖及
孔顏孟三氏子孫會太學觀禮禮部以公應命乃獲
遊闕里觀孔林登太山以望東海爲平生之大快云
未幾擢精膳司郎中凡 朝廷大宴會及宴勞四夷
經畫節制禮無廢闕費絕侵漁是時劉瑾用事公深
用避匿踪跡不通或謂公曰公鄉人也不往且有禍
公笑而不答其卓立如此已巳冬擢廣平府知府廣
平附畿內四三年來權奸肆虐民不堪命乃畿內盜
起流劫郡邑不可撲滅公多方捍禦郡中賴以無事
旣乃按行屬邑撫循安輯之省其財力均其徭賦黜

舞文之吏清久滯之獄申庠序之教興禮讓之俗郡
邑熙然治矣逾五年癸酉起摺山東左叅政是時工
部尚書無錫秦公爲布政使與公皆名士也相得甚
歡凡旬宣督餉之務相與諮議而後行人方冀其大
有爲也乃明年甲戌考察庶官有忌公者與黃菲之
譸公間命浩然西歸曰自求無歎而已又明年乙亥
太淑人卒泰州公竭力營塋三年喪畢始徙華州居
之公風流蘊藉人也善吟咏工書華州山水佳勝足
以自娛又常往來武功與康先生游對客命酒談論
古今時出佳話聽者灑然如臨浩月沐清風解
各領清涼自覺地乃年五十五歲而卒惜哉

山東左叅政王公垓墓志銘

孟春

公姓王氏諱琰字邦器別號西溪世爲澤之陽城人
自幼厚重不凡長承庭訓習舉業補邑庠生聰穎過
人一時儒者咸推讓之累試不售公志益篤弘治戊
午以書經領山西鄉薦己未登進士試政刑部丁父
憂守制居喪哀痛踰禮服除授戶部湖廣清吏司主
事屢承差委臨清德州居庸通太等介監督收放糧
斛所至風弊一清軍民悅服司農卿鄒城伯公洪洞
韓公俱一時偉人少與可者咸以廉靜稱之三載考
最獲 恩典馳封如制丁卯太安人卒于宦邸公扶

恒憂回安葬先是公以不獲祿養父母爲歎入仕卽
迎養母太安人於京師曲盡孝敬母氏熙熙然享
天年終服闋陞刑部雲南司員外郎尋陞山東司郎
中時逆瑾擅權專尚嚴刻同僚多以酷暴逢迎公獨
持正不阿法司以平恕明允稱瑾惡之欲中傷未幾
公獨陞陝西按察司僉事時川陝用兵總督軍務左
都御史洪公累聞公賢能卽取軍前贊畫多致克捷
洪公甚重之瑾事敗調河南按察司僉事分巡汝寧
道備巨賊劉六等作亂搶掠畿內雲擾中州勢甚猖
獗逼近汝城人皆危懼况有宗藩在汝尤爲可慮

公殫心竭力爲捍衛之計乃集衆誓曰賊徒雖衆背
逆天道逆天者亡汝輩無懼也我奉命來守此邦死
生與汝輩共之千餘人大遭挫劫奔潰孤城賴以保
全宗藩獲免震驚衆欲慶功公曰賊雖挫魁首尚
在若不急請兵勦除非特汝城難保恐中原亦未可
保也遂密遣人具奏疏入天子震怒亟命將出師
屢致克捷雖曰官軍之力公調度之功居多公又廉
知賊黨趙秀爲汝人其母久禁獄中卽釋之秀聞知
感泣思報適賊首趙璠等七人與劉六等會兵秀急
走報公公督率部下官軍追襲一舍地盡皆擒獲并

金帛等物解送軍門節該湖河二省撫按總督軍務
左都御史彭公報云獨守孤城屢抗巨賊其功尤爲
可嘉等語時紀功官吳玉榮者意望納賄公曰竭力
圖報盡職也納賄要名欺國也吾何敢欺耶時同事
將官皆囊陞貴有差公止賞白金彩段銀牌等物以
旌其勞無怨尤意無何紀功官以賍敗公功雖不錄
大節愈張禦寇有碑後鑑有錄百官不能泯也甲戌
陞山東按察司副使整飭密雲等處兵備兼管永平
等衛所州縣屯田詞訟公盡心竭力爲之地方有賴
丙子薊州歲荒公發倉廩賑濟活數萬人時虜寇犯

兄孫帥衆犯邊殺害叅將等官公同撫按鎮守等奉
命討平撫按憲臣交章論薦兩蒙綵幣白金之賜戊
寅復進山東布政司左叅政分守遼海東寧道公以
誠信撫之除奸革弊境內肅然時有海西夷人進貢
道經開原守將誣執爲賊盜標殺報功 天子遣官
按覈公承勘據實回奏撫鎮俱得罪公以剛正不撓
之氣遇事無所回互人多忌之公曰知進知退天之
道也吾以布衣致位三品腰金衣紫足矣遂解組以
歸公忠孝剛正本於天性傷父早逝常懷風木之悲
迎母宦邸曲盡孝敬之道今大家宰襄垣劉公爲編

修時與公爲同年約諸縉紳皆以策書詩章爲賀處
兄弟友愛篤至鄉人以孝友稱許又嘗創建祠堂以
奉四代神主此尤其孝之大者退休林下十年杜門
不出雖鄉飲盛典有司敦請辭謝不赴不爲人囑託
公事有司自敬重之享年七十有五嗚呼若公者可
謂生願死安烈丈夫矣

山東左叅政史公學墓志銘

王鴻儒

正德六年盜起雄霸跳踉於河朔山東數千里永平
日久所至莫敢嬰其鋒山東左叅政史公于時視河
金鄉羣盜猝至公與僉事杜丙謀曰縣城卑不足恃
以守徙死無益蓋退保濟寧集兵觀釁乃去金鄉入
濟寧選調銳士七百餘人指授方畧出與賊遇多所
擒斬兵勢以振會言路劾公等退避遠緊詔獄遂
皆除名是時陷城比比後多蒙宥而公等獨得重坐
蓋朝廷欲明軍法適會其時也八年春召二子謂
曰吾年且六十數已盡矣函山乾原吾將營樂丘焉

南陽王懋學吾友也今官南都爾爲我索墓志於懋
學吾無恨矣二子驚曰大人何爲出此言公曰此常
理古人亦有爲之者不足怪也夏四月十五日與客
飲散登樓閱書忽疾作遂不起予聞而大驚與公交
幾三十年中間離合不常自忝今命方明胥會以瑩
平生豈意公遽至於此公之先有諱崇者以功封溧
陽侯子孫因家焉父墳以公貴封戶部郎中母沈氏
封宜人公少岐嶷髫年賦詩落筆有奇語從兄文冕
見而喜曰此吾家異日亢宗子也遂親授以經居半
載文冕去世公感其識拔勵志於學時戴恭簡公提

學南幾一見以爲奇士成化丙午舉于鄉丁未中進士第弘治辛亥授戶部主事差典外廐易牧尋同中官及臺諫勘侵地于南城近郊監漕通州檢甸服田災督儲淮陰一歲當代淮人上書借留從之丁巳陞本部員外郎戊午陞郎中奉勅總餉遼東時邊吏多虛悉心計度察近裏餘積役弛刑徒用轉般法漸以實邊又奏出京帑庫銀三萬餘兩多買粟豆積塞下爲備未幾虜大入軍賦有餘將土豪健虜不得志而遜己未三載考滿再受誥命父母與妻並受封焉是年聞父喪明年遭母喪宅憂五朞哀毀盡禮甲

子服闋復除本部郎中乙丑奉勅理漕事軍民咸
肅綱運不阻清戎京輦不避權近人爲公危之而公
自如正德丙寅陞四川布政司左參議奉勅總理
邊儲丁卯以例裁革戊辰改福建庚午陞山東左參
政未幾盜起而公坐貶焉公資稟和平溫粹樂善好
賢不言人遇勤於問學本朝諸名家文集訪收無遺
下至公文吏牘因簿案錄有關世道無不採摭當代
故實問無不知與人交外無敬慢而中有親疎果其
所厚終身不渝處家孝敬勤儉旣歸課耕治田建始
祖廟葺先世祠堂續譜割常稔之田以供祭祖墓凡

數處各定以期仍志于石命宗人世守之其教子懼
失其良心恒置卧榻之側逮授室而後異寢蒞官二
十餘年廉介公勤如一日爲文渾厚博洽不事彫飾
所著有埭溪集二十卷金淵節孝錄溧陽人物記又
若干卷俱藏于家

山東布政使司左叅政敖公璠墓志銘

俞憲

古人定交以盛衰存亡爲節而敦本植倫之士必以此自考見云余自始進持服家居則聞浙中有恤刑而賢者爲郎中敖君及後上天官補刑部郎則又聞署中有恤刑而賢者爲郎中敖君時君固爲郎中恤刑浙中也余恨不及見旣君以恤刑竣事還署署中故事僚長貳自公見外壹以齒叙進退別坐而容色言語不免有所以長長貳貳者存乎其間君獨脫去凡習裏外一誠無所以長長貳貳者存乎其間以故

僚友多就之初君常物色余意或魁岸奇辟要眇闊
畧不可近而余以雪知君故方傾心君君規之積旬
日乃信余而定交也居三年君遷兵備副使去余亦
尋罹罪譴而君兵備太倉州太倉州與吳錫近邑往
來必過余其容色言語加于余者忘其爲遷人也余
亦自忘爲遷人與君上下議論握手嘆時事如在署
中時不意別且五年而君逝矣君居官穎達博裕而
不爲魁岸奇辟之行明潔貞毅而不爲要眇闊畧之
談所至能任大事持大體頗不爲浮俗是非利害所
奪初還署會言官論順天鄉試不公法當治無何又

有論甲辰榜大臣不當私其子者 天子屢下詔按其
事君如詔會僚友按治之自侍從而下逮捕者凡
若干人中外恂恂有悸色中官莫測 上意又日今
徒校持手版旁記所按狀以待 上問諸曹有色動
者君按之自如也有詞臣不受訊者竟訖之有御史
不受繫者竟繫之諸所承伏悉具實以報報兩上
天子以爲平也悉是之茲役也以疑似得洗者先後
凡若干人觀於此而君之任大事持大體繫可一已
署中故清約至不能具茗供故事辦之莞庫者或因
而浸淫其費則莞庫者又因而尅取歲報之羨以克

君憤曰非法也且知其弊而逡巡之與自赴取等耳
乃禁而更與僚友約月出俸錢以給君子財利雖微
必慎如此君既兵備太倉州不逾月州獄失守逸要
囚四十餘人入海且爲亂君不白當道亟發兵捕之
而海賊素驍突又倚新因爲援勢張甚君既撲滅之
不妄戮一人先是江防都御史嘗具疏請兵兵不及
發而平賊之疏上于是 天子嘉其功錫以金幣君
以非大賚賜不敢辭乃以幣衣其母而以金易田一
鍾用貽榮于其後人君按太倉州不專尚嚴而持法
一如著中念已有兄弟交訟者連數歲不能解君將

置之法其人聞之星馳數百金造君廬求君之弟而
沒漬焉弟乃厲聲叱之令亟去不去且縛于官其人
亟還因以告其鄉人而余親聞于其人者也嗚呼此
非操履素定卽吾心有不能自信者况兄弟乎又在
千百里外非啻暮夜抵門可以自決者也君之平生
於此可想見矣君諱璠字貴之自號蒙泉居士江西
臨江之新喻人

整飭蘇松兵備山東布政司右叅政兼副使贈
光祿寺卿任公環墓志銘

徐階

嘉靖癸丑倭寇東南于是時天下承平久吏與民
不知有兵革賊至輒奔以潰復菴任公同知蘇州獨
訓練所統民兵與力戰而躬介冑策馬以先之自書
其姓名於腹背手足曰死戰吾責也雖然先人之遺
體不可棄也茲用以識庶得收葬焉聞者咸感泣公
又與其兵同寢食或連日夜粒米不入口或露宿草
莽植立泥淖中未嘗稍自異所得俸直及諸上官之
牢醴悉分與其兵由是兵亦日奮敗賊於上海之八

國方戰時冠拔劍擊公賴庖人某身蔽公以免公猶
被三創旣而守太倉以積勞疽發于背公子爾孝請
公還郡就醫公叱曰吾誓不與賊俱生幸吾疾愈而
賊滅當與若共太平之福否則有臣死忠妻死節子
死孝而已歸以是語爾母吾不能與婦子計泣幃榻
間泯泯以沒也會報賊至公遂夷瘡出海繫之怒濤
如山南人習舟者皆震眩失色公意氣彌厲手劍麾
舟師搏之賊大敗俘斬百餘未幾又敗之陰沙敗之
保山敗之南沙賊望公旌旆輒遁去捷聞擢山東
按察司僉事整飭蘇松兵備甲寅賊犯蘇民爭走入

城聚保而門鑰不得入民相抱號哭聲震原野公泣
曰城池視百姓重等耳柰何棄之亟命啟門而謂其
守曰賊入者某請任其責活十數萬人明日賊至以
計敗之葑門乙卯賊復大至復大敗之斬首六十餘
級 詔進公副使 賜白金文綺廕一子爲潞州衛
左所副千戶世襲丁母趙夫人憂部使者及諸士民
連䟽乞起公 詔責公大義而特贈公母爲孺人以
慰公公不得已受 命明年倭寇平䟽乞終制 詔
報可仍陞山東布政司叅政以旌其功又明年丁嫡
母張夫人憂海內士大夫方望公服闋出爲 國家

排大難立大功而公以前勞戍午疾作遽卒享年僅四十於是士大夫又莫不悲公用之未竟與朝廷之失士而蘇松之士民則相與爲祠祀公給事中蘇人徐師曾請於上贈公光祿寺卿然其父老猶相與言曰未足盡報公云公諱環字應乾復菴其號世爲潞安人曾祖增祖仕父翔以公貴贈文林郎滑縣知縣公生正德己卯幼警悟不凡年二十三舉山西庠子鄉試登甲辰進士知廣平以才優調沙河丁父憂改滑縣沙河當南北之衝疲於役甚公首爲省厨傳罷誅求以次釋冤獄毀淫祠凡所興革必視民所

便沙民大悅其治潯如治沙語具二邑生祠記及德政之碑辛亥徵至京師公之族有與宗室婚者故以例佐蘇州配李氏先是公以其母歷於嫡不敢爲妻請封公歿爾孝以請始特封宜人子男二長卽爾孝郡庠生次爾節今襲千戶公爲學先行誼尚名檢始爲諸生時大書壁間曰營私者無上虧行者無親又曰充海闊天高之量養先憂後樂之心必如是始可以言士故其歷官清真介特迥然異於時流而忠義之績在蘇松者尤著

山東左叅政馮公敏功傳

王世貞

馮公者其官山東布政使司左叅政也而治漕事卒而贈太僕寺卿予誥尋以公滿叅政考贈祖父爲大中大夫亦予大夫誥叅政法不當贈贈法不當得誥而今得贈及予誥者漕河南告成天子大推恩任事臣獨公最久而前後功又最高以卒故惜之甚其被恩澤有大臣所不敢望者嗚呼馮公可謂過矣公諱敏功字元卿其先居海鹽改隸平湖已而徙郭中遂爲平湖人王父遂平令俊父汝弼舉進士授行人擢工科給事中以直諫謫婁更大邑令晉守吾太倉

再晉揚州同守中單辭罷以公考最封按察副使得
照如公階者也公生而明穎通古今文籍十六補邑
諸生十八從其父太倉與諸生僞異若凌尚書雲翼
徐太僕熈憲副敦張憲副大韶相切劘爲制科業而
不佞真忝公同齒叅其末公是時秀眉美姿馳筆而
長驚毋能當者還爲諸生試輒冠其曹偶廩學宮然
大試輒不利時楊州公已謝事歸而治生又以其羨
贍宗黨公一切佐之三十始舉其鄉第三人上公車
報罷亡何島寇來迫平湖前是平湖城矣往往多資
公力而至是復佐其令憑城爲備禦計甚詳寇去而

有授兵乘間爲虐劉者令以爲倭也懼甚公授甲家
衆夜坐立睥睨間直明而辨兵乃愧退鄉人辟亂入
城城人虞不給時臬使方按部中謬傳且逐之羣咻
使所公聞而往以片言折之解當是時微公幾叵測
凡三上公車乃見收射策高第明年授禮部祠祭主
事詔選良家子充後宮公在行獨不擾坐主拜相
者所親道士以公役騷擾道路公伺其歸而責咎之
相怒甚召公詬曰若不知我門下客而咎者何也公
止色曰台橫道士耳不咎師門下客也卽咎師門下
客而爲師少懲橫者以爲弟子罪未敢聞命相頗盡

赤然竟未有以中也。韓進主客員外郎奉 莊皇帝
卽位詔而南道還其司郎中還還江西布政司右參
議分守南康九江部公行部至南豐而潮兵調者以
餉不足方大掠公召其長好謂曰而與我鄉人也故
爲而言一反手間名爲賊 天子檄大軍至蓋紛矣
餉不足吾爲若治餉其長悅公乃料倉粟庫糗次第
屬於舟而使一郡作導之選精勇尾之以備不敢動
屬方議均田而公所部多山高下饒瘠異狀公使善
計算者周行阡陌間計畝受稅毋得伏匿又爲之平
亭其役爾籍南康未三歲以才舉拜山東按察副使

飭徐州兵備兼治漕河甫至而河決睢寧縣白浪淺
而入青陽決者六皆巨新安左一決者七差小其水
不制睢寧之陸滙爲湖曹口而上故河百餘里以南
盡爲陸淤泥半之漕艘之阻者數千計漂廬舍人畜
無算公甫至受計大吏調士民晝夜併作與其下分
功任難無何決塞各就緒漕舟漸通而大風雨彌旬
水暴漲諸塞盡潰湖與河一來攻邳公時按部邳下
令土其門水勢重不能禦公卽解衣裙裳沙而塞之
諸從官吏卒市人爭效公圍沙皆滿水遂巡解公乃
行視諸決口皆就塞僅月餘而水復漲敗閘家口以

西半弋山左右堤百餘丈公又築之自是隄土漸堅
實不受侵矣會徐州重壁諸邑舊堤潰公又受計大
吏所獨治者南自曲頭抵青田八十里北自陸灣至
呂梁四十里所與監司曹郎合治者直河以下南岸
幾千丈又自茶城隄華戚山曹築單堤一百六十里
以遙衛漕河之閘者諸經畫版築榑木薪土之費與
護視斥埃約束惟公行之最精監司曹郎咸取則焉
公素壯盛當其治河時往來寒暑無間黧瘠胼胝見
者莫辨識始遷河南左叅政公於職不專治河而其
地與事亦故相問撫按臣聞而喜曰吾可高枕矣而

少年喜事者欲從泃口穿葛墟微赤良城等山抵南
北大湖中界兩長堤爲運道以示奇微公與議且屬
之公念諸山道約二百餘里多磐石礪砂不易鑿大
湖相連十四不易隄民力之幾何而雷用之持不可
乃竊而喜事者意未已別欲繇海通膠河其視漕稍
徑而中皆高嶺巨石東土瘠人疲不勝役甫舉事而
驚潰者再矣乃移公山東公議以膠工不易興且不
易竟卽竟亦終塞縣官故不乏金錢柰何悉捐以填
無用而勒以數十萬人力也撫按臣采公議以聞時
柄相獨擅國前後授措於喜事者怒而下書切責人

或爲公危曰內意堅且實才公以治河顯而弗以治
河終之禍且及公公嘆曰吾豈不念禍爲國家計重
耳堅不可奪遂舍公他屬卒如公言費至十三萬金
而無尺寸利柄相稍慙沮用廷議罷之然猶謂人焉
參沮沮今又沮服者何也懲昔執掌故倦耶公尋歸
職職所治稅糧時久已困不給爲平亭其額募墾荒
土流民占籍者萬計已而念楊州公老病乞休歸朝
夕侍湯藥楊州公得公而喜爲加餐亾何竟卒始公
失其母屠淑人戚不廢易已失繼母徐淑人易不廢
戚然皆在壯時體猶爲之柴瘵而楊州公用老壽被

服金紫極園池亭榭之樂其卒也公親視含歛庶祭
當塋日送舟千艘人無憾而公業五十餘矣孺慕益
篤雞骨支牀幾不起服除久之薦者相屬乃從田間
起仍故官改佐漕運公時苦宿病未平人或難之公
膏曰賴上恩得治私今不以爲不肖而屬之大寄
吾何忍負且嚮者親身也親已背矣身當爲朝廷有
遂冒暑抵淮淮之南故有邵伯寶應高郵三湖相連
爲巨浸漕舟過者往往多漂溺因議濬內河通之御
史大夫王公廷瞻疏上得請而公至任其轄巨者與
比部羅君共治公於河事故心通而役者皆習公能

工以大集公終不受其精力水陸奔走且旁治賦訟
覽訊譟輒至丙夜不休五鼓卽起以爲恒事馳督漕
舟自徐而濟凡七晝夜遂昏曠不復省已而稍蘇還
進齊樂微効復出勉治事病浸劇見其婦曹與子相
對泣猶呵曰人孰無死吾幸獲以勤事死何恨叩之
家事張目不答而趣羅君至曰內河成於國計甚利
第太逼湖湖善潰而隄薄萬一如楓子數百里魚鱉
矣幸爲別創堤衛之已而顧其子曰吾死死必有賻
女却而歸諸官羅君色慘沮謂公堤吾職也母足多
慮若子幼何以語我我爲任之公徐曰有家弟在羅

君別而公以萬曆乙酉季夏望日之午整衣冠端坐而逝春秋甫六十子一卽伯禮補邑諸生以秩文著公性孝友楊州公嘗卒邁盜公已冒鋒刃而出之愛其弟敏効尤篤事相師產相讓也與楊州公俱善治生而至饒乃能以義散施不吝平湖之人至今感稱公父子

弇州生曰馮公所謂能捍大菑禦大患者非耶淮之人相卒而祠祀之也公於居官它功績甚多不志志其治河者於國不爲利則抗悍相棄其官而不之惜利則鞠躬盡瘁至死而不爲已真純臣哉玄冥之勤

官而水死何以異也乃國家之報勞臣厚於汲昌而
薄於王延世蓋衆之矣



叅議

山東叅議賈公恪傳

附子定

祥符文獻志

公諱恪字惟恭別號林居子開封之通許人寓居祥符高祖堅宋河源令曾祖思忠元臨洛鎮巡檢祖贊國初鉛山令父麒封陝西道御史公自幼穎敏越人初名鷺提學憲副歐陽公哲見而奇之更今名自里塾選補邑庠生刻意問學雖嚴冬盛暑手不釋卷正統戊午領河南鄉試第二名明年登進士第授行人將命四方人皆偉其才丙寅選授陝西道監察御史

史丁卯刷山西文卷自三司以及郡縣凡匿卷者皆
被劾治罪官吏懾服已巳勅理浙江銀課時處州冠
發戰設備禦民賴以安事奉 命巡按浙江薦能廉
鉅奸頑洗寬澤物克張其職景奉辛未蒙 恩封其
父如已官母妻俱孺人是歲冬丁內外艱服除改江
西道兼攝廣東道事乙亥巡按宣府興屯田練軍旅
凡失邊之事皆悉心力爲之不懈既代歸適

英廟復位慎選老成分任方岳 命京職各舉所知
東魯許襄敏公彬爲翰林素知公賢乃以薦擢山東
布政司右叅議召至 便殿宣諭 德意賜寶鑑千

員爲道里費公懷揚屬以求報稱戊寅兼理遼陽邊
餉癸未督修闕里林廟具有成績先是公按宣府
曾勅奏會都御史李公秉由是有隙成化丙戌秩滿
滿會秉當銓曹考祭遂坐以不謹放歸田里或爲公
不平公笑曰行藏有命何係於彼乃浩然歸汴與鄉
耆致仕都御史婁公良鄭公寧方伯丘公陵張公斌
布政楊公鐸副使劉公安僉事呂公益和公維華結
社賦詩爲樂夏則往遊通許別墅避炎歊優游林下
者十年餘乙未八月卒壽六十有八

子定字仲一別號一菴衆議公之仲子也幼耽書有

自得之趣弱冠就鄉試主司閱其文動目然卒迷於
鑒別歸結委心亭劬書不倦成化辛卯舉鄉薦乙未
丁外艱戊戌登進士第庚子出刺絳州絳人有屠者
偕侶遠出拉諸谷中殺之將私其妻不可又殺之乃
鬻其女以逃事久不明公根株其實誅屠者辛丑大
饑疫公參酌古今爲救荒八事行之悉驗總賑少司
寇何公喬新大加稱賞下其八事於列郡利濟甚博
晉地宜粟約絳人饑不得伐粟粟熟饑者仰之何公
始人疆問曰絳壤何以獨完民曰使君有約弗忍違
耳垣曲絳屬邑有寇聚山澤公乘其新合 健徒雪

夜急構之獲其魁復從平陽太守李公琮入山撫北
餘黨悉委仗卽農初饑民棄子女轉死溝壑日遣人
伺諸途聚而養之凡所活數百巡按御史宋公德閱
視各有餅餌在握歎曰民之父母固如是已弘治戊
申丁內艱歸暇日編輯守令政規庚戌復除易州易
多山近畿內脊薪蒸所出經樵百年山童林空公
爲立良法民以不罷永樂初始建北都民有獻棗栗
者久之歲以爲常乃列園林登耗之狀以聞得減其
半甲寅以考最擢山西按察司僉事適巡撫都御史
張公敷華訪時政公曰如高平繁通薪直者田業已

盡淹械國土中永無出期不若通簡邑民物其丁產
稍殷者俾十分出一分償之又欲令州邑簡其民淑
惡之秦甚者識以善惡二籍歲終則勾稽其實而誅
賞之又言山西統屬視他省爲少而晉代藩封固在
焉故聊日滋祿微無極彼解澤晉寶與穀同利三藩
之祿盡併鹽粟均輸爲便多見採錄丁巳正月公卒
于官得年五十有一

參議張繼孟傳

張少參公繼孟字子醇公以禮部儀制司郎中陞山東布政司參議年未五十致政歸居林下家徒四壁立居旁建茅屋三楹鑿池爲橋植竹數竿扁爲一笑亭日觴咏其中禁足不出客至第肅至階送亦不出門卽朝貴枉訪止折柬相答于勢利紛華泊如也嘗言作人須要有趣對俗客嗒然無一語遇學士大人有道術者與之譚說名理揚榷風雅聲聲不倦令人灑然不能遠別前輩一時如西涯相公蒲汀尚書皆海內宿望常聯輿過訪公或畱坐所共脫粟之飯間

出蔬果盃酒三五巡卽止諸老宿自公第出輒喜見
眉宇相謂曰吾儕遇張子醇一飯勝倍別家盛筵矣
其爲人愛重如此楊方伯守粵旣第筮仕揚州府推
官潮行候謁請教公謂曰只要做得人好不論做官
做得人好時充軍也得爲民也得夫當後生筮仕初
卽爲此屬語不爲忌諱楊公亦終身佩之不啻爲不
肖語古道如此年八十卒卒之日至無以爲殮其子
以訃聞於諸同年在京宦者得贈若干金始克襄事
云

山東叅議華巖劉公寓墓志

吳朝議

公諱寯字振道別號華巖生而穎異在提抱中人已知其不凡長就外傳明詩經精舉子業弘治壬戌遊邑庠正德丁卯與兄孟齋公寂同領鄉薦越甲戌登進士第明年授徽州祁門知縣部民程氏有辟獄已成公訪知其冤翻成案力請兩院脫之養馬之家有強梁奪其驢者成顛疾公得其情追而還之顛遂愈孺學久乏科第或謂學前民房參差官舍傾圯使然公則以學校爲首善之地士類所聚遂捐俸改葺民苦坐派解外軍需公蒞任切如痼瘼在身卽爲白當

道征爲稍緩流寇接境委官顧義兵遏之賊間道趨
近壤公奮臂率民兵扼要害擒渠魁數十餘黨悉遁
散士民爲立碑婺源令缺當道更公署其事婺民歡
迎祈民遮泣已卯陞南京刑部陝西司主事庚辰轉
南京兵部車駕司員外嘉靖改元轉南京刑部河南
司郎中獄多平反欽天監天文生貧富家有貢緣奪
其業者禮部大堂允之郎中賀公縉執法牒公公亦
如法斷忤大堂意致禮刑二部上疏下三法司議卒
如公所擬朝議大禮上疏爭論執政不能破其說丙
戌陞山東布政司叅議分守遼東千戶哈英懼罪公

誠心體訪知其究竟活之由此忤世謝事百姓詣察院擊門保畱不能及直道難容公又何愧焉時公年正強脫然林泉且曰孝友乎家是亦爲政日與兄弟色養太孺人楊逾十年楊卒公居喪哀毀至襄事一思一語及太孺人輒涕泗潛然自是角巾私第不入公門暇則著書立言攄發其平生識見所著有潛夫一班集行于世

按察使

山東按察使石公渠傳

潘埳

石公渠字翰卿別號天全道人世爲泰州人祖希永
高邑令改掌山陽縣學教遂占籍清河縣卜居淮之
清江浦公穎敏超卓剛毅老成舉成化乙酉南畿鄉
試登丙戌進士擢刑部主事遷員外郎平允守灋陞
山東按察司僉事分巡遼海東寧道兼管糧儲遼陽
倉糧腐爛者半首按究官吏奏黜爲民州衛倉焚蕪
聞風落膽有改行自新者卽加獎籍以勸其進人皆
感服在遼陽數年撫卹官軍禁革奸弊邊境賴以安

堵擢本司副使改巡他道一日郊行遙見人影出沒
林木中近復不見命部卒搜叢林中得頂包僧十餘
人解其包有物在焉鞫問之昨宿尼寺殺商人而奪
其貨驗尸賊皆伏辜奏毀其寺尼配諸鰥夫癸卯山
東大饑奉巡撫牟都御史檄齎銀五萬兩糴穀江南
太平府渡楊子江風浪大作舟幾覆人皆號泣公歎
神色不變焚香祝曰此行爲救數百萬民命渠何足
惜神其鑒之言未旣風浪頓息載穀而歸上下胥慶
分賑饑民賴以全活未幾陞本司按察使審核重囚
日有平反察舉貪廉憲體肅雖老吏進呈文

惴焉莫敢仰視黜姦猾舞文者數輩令行禁止丁未
會朝 覲考察主其事者頗有宿憾必欲置之散地
先期有聞遂拂衣而歸置萬柳莊奉二親正德丙寅
恩詔進階一級病卒年七十一

山東按察使周公鑑傳

周鑑字孔明正統乙丑進士選授監察御史出按江西大學士陳循子所爲不法鑑按單大辟還其園祭田廬子女若干陳切齒伺以申之無所得已風節遷雲南按察司副使終陳在政府九年不遷鑑所至汰墨理枉仍開寶泉壩積水溉田多至數萬頃後以通考過家行江中風覆其舟僕有周濟者絕木從傍出斧舟得鑑尚端立無恙所帶俸金僅二百兩永數襲貯囊中驛吏自水底鉤以還鑑鑰藏如故衆驚以爲神尋陞山東按察使乞歸與布政李正芳發事董

應軫相友善三人者有雅望縣爲建耆老堂于治右
有大政及事疑而不決者必咨而後行之

副使

山東副使張孟兼丁傳

方孝孺

張孟兼者名丁金華之浦江人也孟兼爲人侃侃自許涉獵書史頗有俊才爲鄉里所稱會天子詔徵中能士郡縣以孟兼名士擢國子學錄禮部主事遷太常司孟兼固負自能爲文常奴視同輩而是時誠意伯劉基以文章有重名與翰林學士宋先生俱爲天下所尊信基氣豪不肯安下人而獨喜稱孟兼嘗爲上言今天下文章士第一爲翰林學士宋濂臣基次之不敢辭又其次則有張生孟兼其餘臣知也

孟兼爲基所稱愈自高然他人弗服也或稱慢之孟兼輒怒嘗以文示其鄉人視之無言其袖中曰俟夜熟復之今弗悉也孟兼陽爲好言曰須刪錄之可也退則大怒其鄉人發其所短揚言於衆罵之且詆其文曰彼猶蠻夷山谷中縱爲人衣前懸而後曳左侈而右欹視國工所製何敢望哉其鄉人自如不與較旣而孟兼以謫輸作鄉人不及言及以赦出復官乃賀孟兼怒罵若見人失官則棄背不一視及復官乃更謬爲卑讓賀我若真細人吾何以禮爲偕坐不起迎送其傲睨好面計人皆如此人以是不附之每爲

宋先生言先生易不於上前薦我先生亦才孟兼欲薦之未有逕會上欲用越僧證問先生嘗見證文否誰所有且索之以觀時證爲書與孟兼論性命先生因言太常丞張孟兼所有之詔先生召孟兼以證文至上覽畢顧孟兼謂先生曰張丞卿門人也先生對曰非臣門人乃臣里中子耳且爲文有才甚誠意伯劉基稱之上然視孟兼曰生骨相薄仕宦徐徐進乃可耳母驟也未幾除孟兼爲山西按察司公事孟兼服勁疾惡抵司糾撻奸猾無所貸株連徒黨相援引每一事株流數十吏民見張公事出行部皆凜然墮

歷如鬼神驚聞 朝廷降副使移山東而山東布政
使吳印娶鍾山主僧上親選拜官妻用金帛寵之甚
厚印以見知人主自尊重禮節少簡孟兼自負其能
無敵且印新用又僧也易之印候孟兼由中門入孟
兼以爲印雖位大然我風憲司不當由我中門召守
辛笏之月朔望入學謁孔子畢令諸生執經講說孟
兼故以語侵譏印印不平時初刊大明寶鈔印不令
使兵民更自至庫費錢民 而孟兼謂此詔印印擅
行之是違制也騎馬入布政司譴筆僚吏問罪且言
將上封事言于朝其僚吏皆大恟勸印卽上封事言

孟兼見陵侮然孟兼封事終不上也上覽印言以爲孟兼凌我任用臣不遜治笞之孟兼既辱愈憤卽捕爲書封事者欲論以罪印復上書言狀請去位避孟兼之謫否者且爲所擠上大怒曰彼乃敢與我抗耶吾今乃與爾抗遂械孟兼至闕下廷詰之命衛士捽髮摘拳至死特諭棄市詔印曰吾除爾害矣善爲之初孟兼遷副使山東自陳父老大夫爲之請假上許之孟兼歸至家縣令丞皆門謁奉酒牲爲禮孟兼坐受其拜不荅麾洒卻之鄉人皆勸其少遜讓和以下人孟兼不聽及于敗或憐之或快之以爲宜然孟兼

中寔無怙賊之心祇以尚氣好高人以故爲人所陷
才能者人所欲得也苟無謙遜以奉之而挾以驕人
其爲身害奚怪哉孟軻之才使能克已下人雖不幸
未必死而欲尊大其勢而眇畧它人謬矣法雖過嚴
其成于此酷厥有自哉

山東按察司副使彭先生勗傳 葉盛

先生彭氏名勗字祖期別號春菴宋御史中丞思永十二世孫也系出唐安定王後吉州刺史玠始居廬陵山口六世祖司農少卿少英從文天祥起兵勤王始遷今永豐故今爲永豐人曾祖貴德以書經試不偶乃業醫濟人家有種德堂蓋期待其子孫所以識也祖景忠父叔敏先生生有異質七歲日記數百言嘗從鄉父老人佛寺獨不拜寺僧強之不從反叱之曰彼佛裸跣不衣冠我何拜爲人大奇之父聞私語之曰爾能力學以繼前人聞乎卽應聲曰吾能之於

是遣從里儒曾以南游大通經術年廿六登永樂乙未進士念親老乞教職就養得南雄府教授在官凡得一美永食必先奉親諸生化服其爲教以經書熟讀講解爲先作文次之每選諸生之尤者聚一室同飲食躬爲訓導至終其任不替造就甚多雲南鄉試得爲考官驛舟抵廣南界有稱臨安府生求見贊以黃金先生笑却之三日復尾其後因怒叱左右擒其人不得既至方鎮諸公禮待甚厚凡場屋事一惟先生言是聽乃知黔國公晟都帥昂二公以考官多私是科則各使人偵之獨先生嚴不可犯故爾九載赴

吏部以急關仍除建寧教授績效如南雄有許宗道
者以醫書爲權要所箋因中傷官民人詣事之按察
副使土增刷卷來卧疾道中許一女孫飲人家而寘
輜於生員游亨門亨歸怒毆其輜夫許銜之卽以游
氏父子魘魅入誣且以其居近童五郎祠爲証遂置
于叔父七人重罪俱就其平民因神而下獄者四百
餘家且以增素敬先生恐先生直其誣并譏先生不
得見一日官吏聚揖增言茲事不枉人畏其威皆曰
然先生獨立而言游氏非巫者五郎非邪神初捐地
築城人也事載郡志大人勿信譏衆駭愕而退少選

召送志書入乃大愧悔盡釋無事增亦卒正統元年
以少傅楊公士奇薦召拜監察御史提督南畿儒學
師道卓然教條畢立寬嚴得體一時東南士風翕然
振起已未廷試三甲魁選悉出先生至今論南畿提
學必以先生爲第一青辭嘉定縣民朱行等三人非
謀殺人建平縣民陳良二陳文二等十五人非強盜
米服其明教官有持身不謹者卽就黜楊州安慶知
府不稱皆劾罷之又幾九年以內艱去起復拔授考
功郎中先是司府州縣及雜職等官考滿當黜陟者
雖公罪但經納贖亦從私罪降用不報爲私過者有

罰先生謂此不合公罪不降律巡檢倉庫稅務河泊等官犯笞杖罪者不論其功績卽於原授資級降用先生謂此合從當陞資級降庶不違定制而前官文過譁然相攻以爲行之年久卽爲例不宜遽更部堂爲大閱洪武永樂中已行卷牘一如先生言譁者始服至於吏胥歷役多弊言者方多法以繩之得罪者相繼先生謂法出奸生若不爲定規易守將攪撓不已乃自入奏詔可之俾部堂議條例以進考功爲之一清獨趙侍郎者怙勢自用與先生不合嘗面以言誘之先生應之曰勗所知守成憲以合公論耳若徇

時干位非素志也遂奏先生學行雖優疎於吏牘宜
認爲郡不報已而竟用闕補山東按察副使士論不
能平王文端公雖極知重先生而亦莫能主也未幾
有已已之變廷議以先生可用乃勅簡練軍壯固守
城池督造軍器送京營於是不憚出入之勞雖荒崖
絕島必親歷以伸寬宣澤爲已任屢抗攘外安內之
疏直言不隱如是者又四年以老疾自陳不許巡撫
者再爲之奏始得歸時景泰癸酉年僅六十四先生
正學直道確然自守壯老一攷不爲流俗所惑南雄
學後舊有小祠肖一女子中坐每稱之云靈甚學官

弟子恒設祭先生初至家人詹累卒有爲之私禱遂
安明日先生令積薪祠前躬寘火焚之後屢見光怪
有勸復之者拒不納怪亦尋息嘗奏言釋氏云凡人
平生所爲之惡皆可脩齋懺脫道經有云不忠君王
不孝父母姦私邪淫之罪亦可誦經而卽滅爲惡明
不天討幽有鬼神而日齋醮可滅豈理也哉且脩齋
起於梁武設醮起於林靈素固非盛世可傳之典誠
世之大害宜漸除之及毀去天下不係叢林寺院停
給僧人度牒勒今年少僧尼還俗禁止勸立菴寺脩
齋設醮庶治道可復所至拳拳以名教爲事若建寧

胡文定蔡九峯真西山輩稱尊賢堂秩祀之官如漢
五更桓榮大司農朱邑吳將周瑜宋范文正公胡安
定歐陽公朱文公游定夫元高郵守李齊等墳祠皆
爲修建又嘗言堯舜禹湯文武周公之道非孔子則
述六經垂憲萬世則其道無傳所謂集萃聖之大成
也濂洛關閩之學非朱子註釋六經而衷集諸子之
言則其學不明所謂集羣賢之大成也今 朝廷於
孔子至矣而朱子建寧舊宅有祠無祭子孫身服徭
役誠非所宜亡定議褒崇幸甚疏人公議是近年增
入從祀者多大賢之後累加恩典先生有以導之矣

所著有詩文若干卷山東郡邑通志勝覽等集藏于
濟南書傳通釋傳學者又嘗集朱夫子以下讀書規
範名曰讀書要法若干卷門人葉盛曰先生剛方正
直道大而才高觀其在學校在執法在考功皆有成
蹟而獨不爲時宰所容大都可知已使當時處先生
而得其宜則所以發揚經訓丕變斯文不獨有可望
者乎昔張子厚浙東按獄明道先生特疏懇留彭先
生則既冒不閑吏牘之詆矣乃猶以一察官之亞僕
僕走塵埃中迨老且休不聞有明道者出一言留之
先生亦不遇也哉先生亦不遇也哉

副使鄭公敬傳

黃佐

鄭敬字德聚東莞人少秀異明敏讀書雖易於記憶然每誦必百過乃止夜誦非三鼓不休取正統壬戌進士授南京湖廣道監察御史尋改道江西廉節自持曹無滯牒同官憚之六載陞江西按察司叅事改河南雲南滿考將之京土酋知其行李蕭索循故習賕以兼金異貨家人或勸之受則大怒叱之曰我司風紀二十年享有常祿猶懼弗稱況敢暗昧改節以欺天平成化丙戌陞山東副使食少事煩方踰四袞而髮盡白卽自陳致仕歸卒于家年五十八其卒也

東坡全集卷之五十五

年

幾無以為飲人皆稱之

山東按察司副使王和傳

子念昭

永平志

王和字以節遷安人成化戊戌進士知館陶縣布愛
舉滯再知金壇加謹於昔召入爲御史贈父政爲四
川道御史歷巡兩京在南道巡視鳳陽洗剔夙弊劾
戶部尚書張鳳在北道劾西廠太監汪直并奏革西
廠聲動朝野監試山西號得士解元張潤後爲尚書
陞山東海道副使巡察不避寒暑而青州盜平瘴疾
卒于官生平廉介剛方不移於時好卒日貧不能歸
葬按察使陳璧哀數百金爲賻始得襄事焉子念宇

廷重弱冠領鄉薦登正德辛未進士授戶部主事歷
禮部郎中往南京縣令郭禎具六十金爲餽贐堅辭
之巡按許翔鳳爲立進士坊謝曰邑民貧矣寧忍爲
予歛怨乎竟寢在南京值逆濠干紀監朝陽門城守
軍事平賜白金綵幣陞知九江府值濠亂後百務廢
毀漸次修復而民不知勞調程番奏開士民生貢額
使夷知向化却土官千金饋而竟寘之法居鄉益以
廉靖自守事母具孝養友兩弟推先業畀之惟以餘
俸市地百畝自給家居二十七年足跡不至官府絕
不言公事惟喜吟詠能鼓琴逢勝日嘉山水必邀佳
遊朝夕觴咏不倦居喪制行朱子家禮士大夫家化之

山東按察司副使李公惟聰墓碑

公諱惟聰字自愚河南杞人也生而異狀碩首豐背
厚面腰腹方闊身長七尺力舉千斤望之竚竚然躍
馬擊劒儼捷如俠士性質氣猛趨義若奔甘淡服勤
避汚如不及少習朱氏詩夜誦畢則入空室習劒懸
枕作壘爲攻擊之狀讀古兵法有妙悟成化乙酉舉
于鄉後屢上春宮或獨行無僕荷杖踰驢慙少駭散
丙午選邳州知州河漕荒田公相地勢之宜走潦開
渠抽棘辟畝歲八倍常流民復業蝗不至境上官驗
而稱之弘治壬子河決黃陵治河大夫劉忠宣取公

供事河久未塞公忽悟壅埽法蓋先於岸上作臺後
密置兩木於下背環繫索臺上作埽堅築之長七十
丈高二丈乃抽木下埽於水其激流則并下二埽又
以草束上密其隙河則東注不溢作堤延袤六百里
公以四十日成均分合工毋敢買佚奏功晉工部都
水郎中改繕部采木湖南與申北虜大八寇大同兵
敗死晉公山西按察副使大同兵備公比伍閱精十
抽一拔制兵長短互用馬步錯行因藝執器不強未
能挑牌防矢戟車立藩畫則治武夜則固壘旗鼓號
令馳聞相辨自半三千與同辛苦又修邊城續斷剗

複外曰大邊內曰小邊皆十里一墾中舍小墾或三
大墾守兵五十人小亦得半由是士躍馬騰烽燧不
舉又三年改山東副使管遼陽屯田又深究其病源
格李權貴皆受約束並遼察田益市牛耕鑄鐔鈿
刷給農之具能自具者丁壯與勸歲益田若干頃造
冊送府恐防射沒皆公自畫疆界手筆尺寸又欲倣
古井溝遂畝潄暇則便耕作警則阻馳驟值改官不
果正德丙寅又以急命往宣府飭兵防禦而不收至
公年七十致仕

山東副使王公臬傳

于樵述

先君諱臬字汝陳正德丁卯鄉舉丁丑進士初授兵部車駕司主事諫武宗南巡忤旨與同事者午門跪廷杖有差以外艱歸服闋除兵部武庫司主事以母老乞南曹一職以便親改南京戶部四川司主事尋改南京吏部考功司主事晉稽勲司郎中山知東昌府以母老陳情乞便養改寧波仕至山東按察司巡海副使東昌土曠人倍召人開闢編戶有土民遷民之具田稅多寡初無定則而豪猾因得以上下其手富者種無根之地貧者納無地之根先君因民

具奏奉 命爲之丈量先君生長南方洞知量田之
弊全由委任不得其人故本以利民而民先見其擾
或反有因而爲姦者而民重受其害也選于所屬得
知縣張四維等分任其事而躬親按校之同一州七
縣未嘗費公私一縑而宿弊頓清均田之後熟地或
三四畝納糧一畝荒地或數十畝納糧一畝四方逃
移者聞風復業先君身率諸屬存恤安重或爲之處
給牛種禁州縣科敷之不時者 本府夫役除高唐
恩縣在平陸路應付外沿河復設有聊城臨清二夫
版每版歲該編接遞牌夫一千五百名臨清版舊例

每夫徵銀六兩五錢總解州庫送時領募年終送兵備道稽考本府不得與聞惟柳城嚴全解正身走遞率爲無稽棍徒包庇一身常兼數役空名影射姦弊百端先君自到任之後令各州縣於應該役一半徵銀一半走遞聽民自便不得抑勒遇有使客往來先儘見在人夫差撥如有不放給銀顧募嘉靖七年冬會計一年之間以存省夫銀三千八百餘兩八年新審均徭具申巡撫解夫減去銀二兩五錢河下接遞出給印信長單上水下水夫有定數過客不得多索夫役不得脫逃問卷馬公以傳巡臺經過縣官送

夫頗溢常數馬公輒發還曰以成賢太守之美少師
楊文襄公一清與先君書曰蒞任以來清簡牧愛士
民歸心惟過往士夫間有不樂者大要接見稍踈及
人夫接遞不滿其意耳夫要衝之地往來旁午安得
人人接見之哉省夫役屢有 明旨皆不足恤然亦
不可不知在善酌處之而已 郎中劉正一書曰東昌
政聲遠播且停止河工一疏活數萬生靈之命部堂
諸老甚爲羨服盛公回咨于吾兄則常服于奇徵則
攻訐此所以二兄以此敗而吾兄愈有名也前任海
道副使馮公時雍書曰海道團操 聖書所載付之兵

柄責以截殺中軍之設操厥之建爲慮遠也奈何以
小說而廢一旦有警何以待之又云議處車夫等事
尤見老成至慮先君往真率待人坦易而干事未嘗
苟同平生不欺人一語坐無箕踞行無左右顧遇意
所不可若嚴厲不可犯而度量寬洪能容人之所不
能容先君生成化丁酉十月初九日終嘉靖癸丑十
一月三十日年七十有七

山東按察司副使沈公鍾墓志銘

魯 鐸

公鍾字仲律姓沈氏其先長洲甫里人高祖興宗
仲祖以成祖孟新以人材徵不就洪武中徙閬右實
京師始占籍上元父原本敦德循理以公貴贈禮部
主事母舒氏封太安人公昆弟凡五人兄鑑長山知
縣伯鐸鐸皆出前母母弟鎰兵部主事公生岐嶷絕
羣童時得長山君題紙於棘院見星有好風好雨卽
悟天道常寃從雲間及公正大學問所爲文竄訂數
言喜爲作吳語曰是卽文矣爲諸生應天惟堂鼓鳴

乃一出舍古聖賢書諸史無不讀者所業不苟獨集
于時好天順庚辰登進士會選科道不赴曰恐言未
足利天下授監封主事請便母養改南客司扁所居
曰思古日劬書其中倭人入貢督奪人市物公給
資至禁之無敢登岸署司儀制值 萬壽聖節六卿
同一人奉表賀時章恭毅公爲禮部侍郎有所執論
與片行同官無可下者公從容一言卽爲趣雲崔莊
敏公爲冢宰時知公名欲見之屢使從公借書公檢
付而已卒未嘗往見蓋望公公道詩友有若章公樸
羅公倫者凡九人故時有十君子之號陞山西僉事

提學莊敏實薦之內艱起仍舊秩除湖廣理刑秩滿
遂擢副使提學尋以山東學政不舉特改公往歲餘
上書乞休致不許因號休齋以見志書再上乃得報
即日南歸年五十七家宰致仕尹公出餞贈有平生
負正氣之句旣至上元以其子寶迎奉居江夏公也
易不事表襮心不留毫髮私家之有無不省孝友天
至官資入必跪進太安人不妄私篋弟未舉時朔望
謁文廟必徒行赴部而以所乘馬送之長山君有二
子不能養日三餽食逮終其身仕餘三十年一無所
干謁西涯李公嘗謂今之不識相門者公一人耳直

通性成至接人則和氣滿然聞人善稱道不置雖不
解飲酒燕會未嘗不終提學三省身教大行故一時
多賢材所至詩成輒大書道勁盈尺竟壁無傾斜在
江夏居間校古今名集時有批評客至語世務變形
於色忌小齋祭老猶號泣如嬰兒云享年八十有三
所著文有思古齋集詩有晉陽楚遊等集門生李希
以天賦復併刻之總謂之休翁集云

山東按察司提學副使戴君冠墓志銘

樊鴻

君戴氏諱冠字仲鵬號遠谷先世江西吉水人父誼中弘治戊午鄉試累官至趙府長史娶程氏贈太安人生長子巾次卽君也君幼嶄然自出謹禮客未嘗娑娑嬉遊長從吾師何子於京師苦學至困疾輒益弗懈是時長史公仕獻縣學君每省視往來途中口誦不輟途人皆異之數年盡得何子之道嘗讀其文曰彼有善不善何子稱曰哉生妙悟諸人弗如也由是名聲籍甚正德丁酉舉河南戊辰登進士第授戶

部主事主事三年憂國用之不足而見冗食之衆也
于是上疏曰臣聞立國以人聚人以財祖宗以來
百六十年倉庫積蓄未見其有餘軍國經用未見其
不匱海內虛耗物力頓屈此何故也今宣大陝西諸
邊教有警報戶部運送之使相繼告急之不絕加之
北直隸河南山東徐淮之境水亢爲災小民逃亡不
知陛下亦嘗少念及於此乎臣惟古人論理財皆
務去冗食臣見京師勢要之家子弟家人苟竊爵賞
錫衣官屬出餘次者係籍勇士投充監局匠役不可
悉計實皆所謂國蠹也昔國家嘗運每歲四百萬所

入足供所出尚有贏餘近年水旱相仍所入不及前
數而歲支適當繁計此輩所費三分之一 陛下何
忍以赤子膏血養此寔乎又曰臣聞兵貴精不貴多
邊軍生長邊土習于戰陣今一遇有警便遣京軍彼
居則惡其奪食戰則恐其奪功烏肯盡其死力也哉
虜退京軍掣回矣宣府兌調官軍三千餘名累經臣
下論列堅不肯從不知 陛下何所顧慮而不從此
乎又曰臣聞天子藏富于天下者也若務鳩聚爲帑
積之積是匹夫商賈之計比年逆瑾既貶所籍財產
不歸之有司而貯之豹房遂創新庫夫供御之物內

有監局外有部寺不知此庫何所用之疏上大忤貶
廣東烏石驛丞是爲正德十年烏石居七年種蔬自
給益肆于學嘗赴廣州夜行海賊入舟君惶懼投水
若有人捧出者三乃獲生嘉靖改元起戶部員外半
道陞延平知府延平幾一年適當入覲君弗治行一
日肩輿出城隸人問何之曰直從北路歸爾一郡大
驚其職直如此尋改蘇州數月拜山東按察司副使
提學未幾任遭長史公之喪服闋而感風病積久不
起矣

山東按察司副使羅公循傳

子洪先

先按察府君諱循字逾善員外公之仲子也爲人魁
碩廣頤巨目隆準方頤美鬚長尺餘吐聲如鐘性
剛嚴慷慨急於義而厭猥屑自幼從大父經歷公授
尚書未幾公入國子監而員外公素貧常不能得師
府君乃發憤自閉一舍晝夜誦讀不輟同舍生嫌其
異已邀與觀畢 劇戲府君給曰我固畏夜行已而
舍外數有怪同舍生避去府君顧益自喜得專誦讀
十四五爲文章卽有繩準長老輩見而奇之於是
史李公勲許妻以女是爲李宜人李公爲新野訓導

年二十二往就婚始至試令背誦書不遺一字試爲
文操筆立就李公喜延二師爲解尚書及諸史傳論
年乃婚新野去漢中白河數百里府君因承從往來
遂留爲諸生白河諸生間有南人至囑其壓已也黨
惡少爲誣訟府君直之官罪坐訟者卒不得誣而俗
故以酒食微還不喜詩書府君日與高會飲酒夜則
程書雜鳴乃罷楊文襄公一濟爲督學僉事試府君
驚曰此非白河生比告故則又自喜曰我固能知之
今當不失題選他年必爲良吏也遂指目以戒諸生
諸生驚曰今日乃爲南人所屈府君聞之是年引疾

不就試弘治乙卯舉鄉試第三人上春官不第楊公
延爲其子師已未登進士第觀政刑部諸進士登第
者率假貸飾僕馬服舍府君布袍蔬食不異平日是
時尚書閔公珪侍郎白公昂皆精濶家令諸進士試
閱獄日幾狀府君時時持刑書就長人問所疑有所
註一一取長官可否閱狀已卽又代閱諸進士狀
已而代長官若獄事莫不當濶遂以刑名聞于時辛
酉授南京刑部廣東司主事廣東司主京城內外獄
訟號繁冗府君剖決無滯凡五月以員外公愛歸
子起復補工部都水司主事管徐州洪故事役夫輓

上洪及漕索漕舟糶米而民舟則予募錢官爲裏分
懷墨者陰減其算甚則指他費盡沒入之諸舟爭道
日起訟府君至首罷漕米總役夫以甲乙而什伍之
民舟先後次步下入所募數役自甲乙持籌往已事
受錢于舟還筭而休終則復始官府晏然常以暇日
治隄防水復植木其上以固之役夫往來不知道暑
三年聲譽大著戊辰代歸適武庫主事缺有力者爭
欲得之是時許襄毅公進爲冢宰謁者踵至公曰吾
已得人且奏下府君也府君謁吏許公謂曰爾知所
以得此乎汝能絕外交故以規鏡進者也已已署車

駕員外郎巡視皇城是時逆瑾當構而武皇帝好微行中官義子出入禁內府君故處其變每夜偵伺防守嚴門柝候鉦常立馬風雪中鬚冰結衣領上不取懈庚午陞員外郎署武選郎中瑾私人多在武衛武衛陞罷必關白始行弘治間有已華乳母官三百人按瑾求復府君駁其不可復者五事以爲內降非制名器宜惜議出劉公大夏不可輕改且恐啟倖門糜歲給奏竟寢會考選武衛而金吾右衛指揮張某等二十餘人爲瑾爪牙府君罷其管事尚書王敞以副人告瑾大怒罵曰汝老悖獨不知張某等可用耶

故曰郎中輩爲之敵不知也則又罵曰不能制郎中
妄用尚書爲敵請曰幸無怒卽更奏矣敵歸召府君
怒曰汝後生不曉事乃令我輩受辱萬一召禍汝獨
得免乎卽滿筆峻奏府君走前持奏曰勿毀成牘俱
示姓名足矣故不得已以別情書二十餘人投府君
府君退召書史數十人將別爲奏上當是時瑾氣焰
傾中外稍違意卽置之死府君分必就逮其存初奏
與所書別情實自明也後四日瑾敗被拂驛入部口
囑戰向府君索初奏上之以脫已且曰謝爾早見不
令毀奏也瑾既誅故亦罷去同官以是多府君是時

天下被盜賊起沿江爲其幸未春有詔選
賢守令要害地以弭亂楊文襄公爲冢宰故知府君
乃爲居常調糧鎮江府知府鎮江當饑饉凋敝之後
廩不餘粟藏不餘錢解無完舍百務就弛府君嘆曰
是尚可以應緩急乎爲之去奸胥縮浮費捐官洲清
風弊積贖金贄垣壁備弓弩明年巨寇劉上等自南
京流入境鎮江郭外居民皆奔城而指揮使閉門自
守君聞之罵曰是誠人耶爲城將以衛民未聞棄民
嬰空城也乃斧扁輪納之迫夜乃止復多爲旗幟江
上諸山復以小舟載砲石發葦洲中爲疑兵府君自

乘城鳴炮鼓令老弱各執戈矛擊釜鉦助軍勢呼聲震天地冠遙望不敢逼未幾朝廷遣四將軍將北邊軍來而總督諸大臣十餘人且至凡軍行芻糧器械舟楫駝馬犒賞費盡取之府諸僚佐多避事引疾時君日初出伏謁諸司致供餼受命令日晏始徧出則促辦諸費不就寢者四十餘日指髮爲白已而狼山奏捷上功賜大紅衣一襲府君初屈常調爲守至是又能弭亂而諸寮中譚其方嚴不得騁其郡人貴顯者又以請謁不行交搆騰訪文襄公不能辭復以才堪保障調淮安前守劉君祥嘗辱於寇而諸縣殘

破尤甚府君一以寬厚休養之始錄囚縱釋九十餘人訟者令持詞往逮至則自相引證情服則薄誅毀其詞以去於是獄無累繫御史驟見疑之比得以爲庶幾囹圄空虛之效上治行諸郡第一癸酉擢山東按察司副使奉 敕整飭徐州淮楊等處兵備徐州既習府君行事令下不嚴而肅是時宸濠懷不軌沂邳間私販橫行府君以南北咽喉不可無堅城壯軍遏其衝乃跡境內諸盜面授將士方畧往必成擒所得衣糧錢帛甚衆則爲召募武士凡射穿札力舉重及超乘抵距者悉得應募旣與歲給而旬日輒再閱

試試有重賞於是遠近聞者莫不景赴久之得武士
數百人一可當百會河決西岸城有圯者乃益發其
暇壘堅石爲墊而崇厚其墉乙亥以繼母李氏憂歸
比去積穀數萬銀五千六百有奇布帛雜物稱是府
君既歸而代者掩爲私費於是武士皆解散去戊寅
起復補密雲兵備密雲去京師百餘里其時 武皇
帝出遊日至其地兵備官被戎服擁案隄伏迎界上
有所幸卽令前導趣馬行且跋曳中官益地衆相遇
或以馬羣欲扑爲戲必入胸中官乞憐乃復騎而其
地去古北口邊五十里中官監軍事古肆武斷股削

士卒士卒困甚有警猝不可用府君聞之嘆曰凡若此皆非所堪也今顧得之其命矣夫雖然吾以憲臣奉 聖書行事不出尺寸力何以報 天子卽日就道是時鎮守太監張信驕橫嘗密請敕得節制兵備官聞府君氣岸不相下必不利已乃入疏以兵備官爲冗員請省之撫巡臺臣爭不能得府君上官止一日而報者至遂促裝曰此私幸也不復待次吏部棄官歸寓縣城終歲杜門以詩書課子嘗道賈人訪之門者託辭以謝卽縣令多不得見已而曰此非所以長子孫也則又返鄉之故居自居鄉日與田夫野老

談耕牧事晨夜令小童取芻飯牛養魚或視春稻食
種秋至耕者告獲率子弟開原執柴散薪汗津津下
不自止鄉人見者笑曰憲副公乃親農人事耶府君
應曰我固農人不知憲副者誰也蓋辛勤十餘年家
始足食丁亥吏部用薦者復除山東按察副使檄且
至府君嘆曰吾亦願有所爲顧今老矣臂之棧舟已
有定步又向風波行耶引疾力辭吏部以府君辭甚
力因不復強己丑長子洪先舉進士及弟第一人爲
書以戒曰吾無厚德遺汝汝微祖宗餘惠蒙 天子
厚恩何以自處今而後應爲完人以圖稱塞始以進

士試給事中上姓名第三公卿賀者踵至明日奏下
得之者同年張某也張爲中人養子事以時成有相
告者府君不對其後當選員外郎而競進者又攘之
諸曹不能平嗾府君曰曷自明府君曰彼之進必以
賢也主事年久且爲員外郎何汲汲耶於是時論鄙
二人而益多府君當會試時身故貧一日亡其囊中
屬褐同舍唐君鵬肉不自安物色其人給府君訪之
比入坐唐故戲探其囊出褐示府君曰是不類君家
物耶府君目逆曰汝母戲言唐又持褐相辨府君趨
出向其人曰物固相類唐醉語也唐歸怒曰君失褐

不取何也府君曰不然吾失褐不甚損彼張惡名尚
得爲士人乎唐始過謝不及始如白河嘗從商舟泊
襄陽族舍有來作者府君佯若不論意促之出曰此
非子宜聞也其人吐實則忿怒脫走比舉邪試出棧
道郵亭亭長告曰惡地不可留也強入之夜半戶開
月色中美女婷婷來坐榻上府君意其奔也不之荅
遂熟寢少頃從者作魔語起問之已爲鬼物所侵迺
視戶戶固扃也明日以告亭長亭長曰此妖殺人多
矣而莫能動公公福德未可量也此二事較之魯男
希文何所軒輊

山東按察司副使韓公廉墓志銘

孫陞

嘉靖丁未十月二十三日山東按察副使致仕韓公
卒于家公諱康字守清其先益州人宋忠獻公琦
之裔有名亞二者從宋南渡籍餘姚故今子孫世爲
餘姚人高祖裕七大使曾祖大中祖孟珉父衡娶于
柳以景泰甲戌十月一日生公幼穎異長游邑庠有
名舉弘治壬子鄉試高等丙辰進士授任縣知縣任
土隘人瘠轉徙者半公加意拊循省刑節費民隸是
父母之相率歸附縣故有契悅當事者往往乾沒公

賊積貯以城圯鳩工繕城城完民不知役三載政
成徵爲廣東道監察御史行之日老幼塞衢攀轡車
不得行已爲立石紀績乃後盜起攻仁縣城弗能克
民感公道思復紀之石繫思焉爲御史首上選正人
崇正學疏 上嘉納之印馬南畿陳馬政二事至今
稱便正德初 上命御史按福建風裁凜然漳南盜
肆侵掠督師勦平 賜白金綵紵當是時逆豎劉瑾
擅權欲以嬖孽冒功脇之禍福公不爲動乃藉他事
需再還典在必獲公抗持益力瑾矯詔誚高安縣知
縣已又搜舊縣摘微過詔下貶官者三猶卿之遺繫

禁獄甚困將甘心焉踰年瑾誅事白除通州判官稍遷潞州知州以憂去服闋補知泰州晉河南按察僉事山東副使兵備天津調辰州府知府公屢仆屢興馳騫南北至是益志意倦矣上疏乞骸骨會 今上登極特獎恬退復副使致仕公乃開別圃植花卉日與耆舊觴詠娛樂非飲射讀法足不履公庭鄉人咸敬重之行部使者至餘姚必造其廬問焉年九十有四公襟度高朗視天下事無一可撓情者方觸逆瑾逮禁獄人爲公憂公則曰死生命也憂何益處之裕如傳稱達者齊榮辱一禍福其信然耶乃竟不及于

難乃又以壽考終天道福善公之謂矣陞先忠烈公
與公鄉榜聯名友善約爲婚後各舉子女乃締盟焉
知公特深乃志而銘之

青州兵備副使牛公傳

牛翁字鳴世獻縣人正德戊辰進士任益都令時劇賊劉六等轉掠山東翊曹漢蹂淄河所過城邑望風奔潰獨翁與樂陵令許忠節公達東西遙應屹若巨鎮爲尤臨機設變出入鬼神號稱異特賊嘗縱兵圍城三匝翁日夜距守賊飲兵退翁曰此特自完計耳不一大創賊必復來乃駕子弟兵及諸亡命蹕賊戰大王橋身被四矢扶創疾聞賊遂大奔斬獲無算賊自是不復東矣事聞擢按察司僉事整飭兵備青州開署自翁始尋遷副使仍理兵務嘉靖初頗鎮賊王

常安侯好施聚衆山谷每戰困衆脫之鸞挺身突入
賊中賊覺爲禽以大呼賊衆披靡未幾就殄山西馬
五寨賊首陳卿去據山作亂數年不靖鸞奉 詔移
兵平之卽其地建平順縣爲累平劇寇登望赫然而
懷奇負氣不能腆膺爲說隨熊世亦以此嫉鸞尋謝
病不起終于家

山東按察司副使張公鵬傳

張鵬字搏南，贛州同知。獻之少子，幼穎異，有志聖賢之學。正德辛未，舉進士，授戶部主事，督馬廠効內官私貸影射之弊，計光祿奏革內官需索奄豎創目擠陷，得楊公一清、石公珪直之，獲免監兌湖廣。特請勅而行，又行奏請重臣沿河總督漕運，至今永賴。權臨清稅除革羨餘，轉本部正郎，督餉遼陽，復屯沒公益課足兵食邊境以寧。武宗東巡，權倖朱寧勢焰薰熾，守臣懼甚。鵬奮然具劄前陳，間有諫回鑾而斃者，衆以阻之。叱曰：「事危而默，不忠約議而違不。」

信獨請行在上之值中使奉皇太后旨促駕旋
事寢居二年乞致仕養親帝三上始獲允遂以刺錢
萬緡貯庫而歸嘉祐初起用老成勉強就道抵京時
例先謁執政次朝叅謁竟不往內閣公孚敬銜之補
兵部車駕司郎中退寓僧舍日與林公俊諸公講論
心學大司馬王公廷相高其行數到寓所與相議國
是尋陞山東副使時監司熊者受賄欲脫一二重獄
聘執法不從竟寘林典遂乞致政百姓遮道乞雷抵
家杜門不出闕國學堂西必讀其中有張姓重獄巡
按李公鳳翔巡道汪罔求明于鄂皆不答被罪者懷

千金托解叱之走正德嘉靖疏霜殺按登虞賑濟丐
見載通每月九日聚衆給米以全活者甚衆龍泉
山寇迫縣城署縣梁簿惶怖幾欲自縊鵬力主議固
守募兵拒敵城卒得全遇聖節天變必正衣冠行禮
卽隆冬不廢觀風使前後薦舉皆以疾辭林下四十
載足跡不履公庭年八十歲於書無所不讀尤精於
理學作詩文大都平淡不爲藻績俱不存稿歿而吏
部尚書李公默志其墓有司祀學宮隆慶元年纂修
世宗實錄已經史館移文該省討其病故年月錄入
立傳

山東提學副使陸公錢列傳

張時微

陸錢字舉之副使侑季子甫能言母楊淑人命之以
字百試不爽稍長慧智開發一日輒數行下爲舉業
文精恪典雅大爲時輩所宗己卯舉于鄉庚辰會試
中式辛巳廷對擢甲科第二拜翰林編脩讀書中秘
益銳志問學盡覽經史百家脩纂素以才名著者皆
嚮下之尤砥礪名節以古人自期待時議禮諸臣故
傾心於錢欲引以爲重錢卒不應其人以爲少已遂
銜之會預修武皇實錄成進修撰已而大禮告成
議禮者秉燭修宿憾遂出爲湖廣按察司僉事職江

防時其署新設除戎禦侮薄書文牒皆創爲之而飭
叙振刷憲度井井諸條竊相與議曰嗟陸君老吏殆
不如矣已而稍遷江西參議職司根儲輒能釐革宿
弊微諸所適負又酌諸郡之贏縮驗物產之登耗
而損益上下之人皆以爲便已又稍遷山東按察副
使職專學校自言曰尸祝代庖自今得少展其志乎
乃明章和嚴品式正文體其雕蟲靡麗則黜抑之期
不徒於大道所至致尚才弟分別義利才儻有爲行
者引之若肺肺士習爲之丕變他如斥異端之祠以
崇祖先哲乃其效之大者山東舊無通志明然漢曰

海岱山川之宗也孔孟人物之望也六經文章之祖也惟茲一方之志而天下古今之事備焉志何可廢遂考古而令補遺正說窮日夕不懈比踰年志成而武則病矣遂上疏乞骸骨其畧曰臣自入東土海罹慘難一年而喪女二年而喪妻雙楸在次幼子在抱又不幸有狗馬之疾願微洪造丐餘生疏入不報遂卒武性資溫厚和而不流口未嘗言人之短而剛大之氣侃侃不阿犯腹噬之戒曾無回忌卒坎壈以沒云

山東按察司副使李公日章墓志銘

徐階

公諱日章字尚綱 今天子紀元之歲與予同舉於鄉其明年同舉進士每飲酒酣輒歌李太白所爲梁父吟將進酒諸篇慷慨言曰士君子必有空宇宙超今古之度然後能不動於物以大有爲於時有如登百丈之樓凭欄而望東海攬三山於几席納百川於杯盂斯其爲度也幾矣乎因自號曰海樓後三年拜刑部主事有巨璫謁公欲有所逮捕公曰越百里而逮人非法也中貴人怒以危言恐公公終拒不聽

員外郎郎中出知襄陽以才徙長沙先是大瀉寇賊
千人屢招輒叛叛則其所焚掠益甚公曰此我驕之
耳遂身督兵往討縛其酋斬若干人降若干人事聞
賜白金文綺郡故喜訟稍抑之卽肆爲詆誣太守往
往貶法以徇公獨不撓至其獄詞則老吏猾胥相環
視莫能損益一字由是訟頓息能聲聞四方遷山東
按察司副使 章聖皇太后梓宮南祔 顯陵當是
時舟之先後行者以數百計吏之奔走執事者以數
千計公私之役遠近至者以數萬計公預籍其數而
爲法授有司令餉以人給夫以舟限俟於境者無後

期出於途者無稽程費大省而事集居踰年丁父憂
會大計天下更有忌公者騰飛語中公銓司不及察
罷公政士大夫意公素剛必且抗疏自明公笑曰仕
宦在行志耳志苟不行卽列侯將相曾不足等海中
之一漚其聚與散交於吾前而吾目猶不屑一顧也
矧足動吾心哉聯諸縉紳之家居者以爲社日賦詩
較奕徜徉林壑間見嗜進者必指其口曰能吸盡滄
海之波乎見戚於退者必撫其背曰悲哉溺於苦海
乎公守官廉傾其囊得百金作狎鷗亭於所居之後
因題所著詩曰狎鷗亭稿當其脫落塵鞅傲睨一世

真所謂白鷗沒浩蕩可望而不可馴者蓋公所謂空
宇宙而超古今之度其隱見不同均之無所動如此
嘉靖癸亥距生弘治丁巳享年六十七

山東按察司副使吳公志銘

孫 陞

吳之先長沙湘陰人也自唐荆南節度使帥道以來
代有閥人至 國初有名受者從戎山西振武衛屯
田塞下世籍焉受生廣廣生亨亨生安安生璉璉成
化丙午鄉薦仕至山東轉運同知轉運后配趙姪有
奇兆而生憲副公公諱嘉璉字惟德別號鴈山性孝
友方戰歲時曾祖暨祖以老壽在慶每晨省先曾後
祖轉運后喜其孝且知禮受尚書於安陽王尹尹閱
其文曰傳吾經者此子也弱冠領鄉薦舉進士初

授豐城縣知縣挾奸剔弊均役募通藩月境內大治
土寇嘯聚于瑞州麻嶺治塘諸塞務甚猖獗至勤天
兵公往督戰相機力敵搗其巢穴總制尚書陳公金
巡撫都御史俞公諫巡按御史萬君寶交疏其功
賜白金綵幣考最擢守曹州是時黃河下流潰決公
刻期築坊爲民捍患大學士靳公貴爲文紀績于石
調守臨清州去之日民遮道攀戀如失慈母畱冠屨
縣之城門臨清兩京咽喉 武廟時中貴出鎮掠買
商賈誅求有司雷燭甚熾公以禮繩之又法制其瓜
牙始稍稍斂迹撫按刻薦擢刑部員外郎將之官余

江西逆變初靖朝議擇守南昌以屬公地瘠民羸紀綱凌縱庶官尚未備公兼攝之時覈宸濠逆狀遲久未上卽援筆屬草不終日而定勅下守臣擇宗裔可續藩祀者諸王類有請求人懷異議公秉裁決推弋陽王輿情簪服歲大旱移檄屬邑獻寬獄疏墾務引咎露禱雷雨大作仍步以歸百姓懽舞郊迎歲復大稔江隄大圯豐城當其衝南新橫罹其害僉曰惟吳南昌可任公乃悉力規計不煩財力旬日而大役告成興萬世利邑人祠之名曰吳家塘云巡按御史唐公龍力薦其賢擢山東按察司副使兵備徐揚嚴

殘酷之禁重情赴之罰訟減盜息百姓安堵翁母趙
忝人喪躡踊慟絕侍父轉運君疾衣不解帶藥必親
嘗父竟不起哀毀如喪母時先後五載蔬素衰絰寒
暑遘疾不入內寢服未闕被誣休致中外惜之公獨
灑然弗介于懷屏謝聲利陶情詩酒而已于官司未
嘗干謁其有裨民事邊防者輒入關白不遠嫌疑平
生議論侃侃依忠義令人聽之有激烈氣人有大事
大疑恒就折衷見恒出於常情所不及無弗駭服而
退然爲人所忌嫉徃徃得謗亦以此卒於嘉靖辛丑
年僅六十有六情哉

江峰呂提學高傳

李開先

呂君名高字山甫號江峰鎮江山在江上有峰而高
名與字號因以類取之耳其爲丹徒人也自其父宗
美祖經曾祖昂以及始祖子實蓋七世矣母太宜人
鄔氏以弘治乙丑十二月十九日生君幼卽聰慧不
凡年十七補郡庠生戊子年二十四舉應天鄉試次
年己丑舉進士選授戶部主事卽爲堂卿儉菴梁公
材所倚重劄管太倉有王鳳李慎太監少監等數人
尚未裁革事多齟齬難行君則調停其間弊端翦而
公法不廢外而運官旗甲內而經歷倉攢無不仰賴

之者余繼亦有此委與君同事倉務甫畢卽相與和
詩論文日有長益而楊卬徠仲瓊季漳野新芳左右
臯思忠王南岷廷黃梓谷華更相琢磨可謂一時之
盛也已而改淮南監視常盈倉初以爲事間可得肆
力讀書文名由此日起調轉兵部武選司主事值大
同戊卒稱亂勅往遼陽募兵足以壯觀而資任本
司員外郎蒙推恩封其父母再陞車駕司郎中時則
驛傳積弊不可勝計又勢要求索難支君勝其事于
驛門卽權力者不爲忌浚川王公廷相以左都兼尚
書臺綱振肅尤畱意人才忽一日謂余曰部郎寺屬

中有負盛名而可繼前脩者乎余應以如呂郎名聞者其人矣浚川曰詩文吾所知須政事兼長方是全才余應以取呂正不獨詩文耳未久 聖駕南幸張方山衍慶以都御史被逮乃以浚川帶管清道刊布告示題覆奏章正車駕司事也日夜行一二百餘里如窮三站二百七十里亦卽一日行之事體未熟才思稍鈍者卽時獲譴况往返六千里閱歷六十日耶浚川初猶閱稿後則惟閱 旨意而已及抵京欣然羨余知人意將薦君子 朝乞大用之以遷官䟽不果 上而稱不絕口數蒙綵幣金帛之賜山東提學

員缺余初任文選卽推君以副使往奎則行政有要
取士無失雖一時有不得意及記題不真者惟斟酌
其平日分量去取之不過刻也士有卓異者拔入湖
南書院親自督課講明正學務得真才兩次鄉試中
式者優等居多署臬司印數月雖瑣務且照及之重
大事無不結絕者吏畏民服雖積年訟獄悉來告審
及訢之撫按願乘時批審者多矣錄文舊多出提學
手君之時文精瑩簡當葉御史經乃置而不用顧于
二千里外求唐荆川之作而亦不過一半篇錄成以
一冊寄余且貽之書曰錄中無僕一字不敢冒他人

之美其間紕繆處必爲禮部之所叅駁是又往年一
余光也蓋先是嚴介溪嵩深恨葉御史彈劾假此報
復之摘其辭之似涉譏訕者以聞上大怒械致御
史并藩臬之有職事者繫之獄罪謫有差而御史竟
死杖下臺中悞以爲君從臾之也甲辰外考楊虞坡
博慮其不安言之冢宰許松臯曰呂某歷官行已俱
無異議今次考察母及之松臯應曰然已而邸報有
名虞坡向松臯扣其由松臯言初擬無事衆御史必
欲黜之惡其曾害道中人豈非寃之又寃哉歸後日
與南郭錢少叅亮輩酌酒賦詩遍遊金焦諸名勝不

但與世無求亦自忘其曾爲官也十餘年極盡林泉
之樂偶感寒疾汗下不快不數日遽卒時則丁巳六
月十六日也年止五十二所著有湖南訓規所輯有
校藝錄戡定三城錄其江峰漫稿余將序而刻傳于
世云

山東按察司副使溫公如玉墓志銘

王世貞

公之成進士至歿凡十有八年爲行人則一使荆襄
爲御史則一按嶢吳越再按秦三仍按吳爲按察副
使則治海道所至皆卓然有聲績而其却荆人金也
荆人至今能道之其按嶢而場人某中倭不登課公
申飭舊制爲稍通融期限以蘇其困立保甲法悉而
伍之什人自爲守搜捕姦猾及選卒之因而牟利者
課自是驟登頃逾於承平時而公所治繕理城墉築
海圩闢堰數十百計其按秦益自標樹風采至則論

同州守某實難令某等貪酷狀遣戍削籍有差守令
望風解印綬去備吏大夫一切受法不寒而栗公頗
求邊所以計婁拙者則後凡二十事條上之報可公
又行刺得某大帥驛舍史士佐虜爲其裨帥不畏
大帥而畏虜狀悉述之至督撫重臣亦有緣而譴
削者邊吏大恟無敢誦所以見益治軍軍聲震俱振
而虜亦竟公代無敢入公又上宗藩七事若補祿
懷肅國吏正體抗嚴門禁尤其要者其仍按吳則益
熟于其利便而於職得兼治大小諸吏有然公者轉
相告報毋爲悅沮公三尺爲而公以爲吳所重於天

下者以賦而其利之最大者水則抗疏委能吏夫以
里毋伏田田毋伏賦賦而不田者竭之田而不賦者
益之且督諸治河官以農暇開濟水稍稍受職矣公
又論罷副總兵一人武吏益戢吳以大治然用事者
以公治秦嚴鮮所縱舍而公不安於臺矣其治海道
而屬登萊與遼之亡命交匿於諸島時時出剽掠以
自益議謂擊之則虜起兵禍勿擊則二郡騷擾無已
時公用楊守起元議外揚軍鋒以脅之而使指揮湯
詔等之田橫王世祿之長山裴度度之崆峒李承賜
之劉公千戶黃汝忠之抗仄諸島召其豪長者諭之

日與若期一月來受署爲良民不者溫公大軍立職
汝矣衆皇恐威來謁公拊循之爲上書二臺編保甲
給田起稅通互市開關梁禁爭鬪島山彬彬約束比
內地矣屬暑郡大旱公齋三日而禱立澍公旣露禱
雨中又以暑故不爲雨具寒內侵遂得疾其民相率
任走告神曰大夫爲民請雨神幸予民而予大夫以
疾非類民今敢爲大夫請命果小間公公念彼不任疾
疾又不任事卽自劾歸且就道已而曰吾守土臣也
敢去事歸乎強疾以待甫得請而公革矣然猶手書
諸郡邑毋祀祭毋賻祭吾不而享也賻是死而僂我

公溫氏諱如玉字孟醇別號少谷其先世以戍
河南之桐柏王父淮徙籍鄖遂爲鄖人父文林公所
娶於左潯人而生公文林公之爲諸生甫著也而公
十歲亦補諸生邸守許某奇公才欲壻之弗果明年
有孫提學者按部試公以爲第二人旣見而笑曰吾
欲冠若以若少疑之今果然自是凡再楚試皆不利
而歿後我先公巡按楚公遂與薦歸及襄陽得文林
公訃甚絕公七日而抵喪所撫棺大恸曰天平誰令
我以一鄉書易吾父也公之舉進士而喪王父淮已
又喪左潯人毀瘠時有加自是得心腹間疾矣公之

一爲御史三按部又一爲海道皆名持憲其居鄉絕不通官府其居官絕不通家問以故病三月且死而其家不知也公生以嘉靖戊子卒以隆慶己巳得年四十有三世貞曰公妻爲執法大吏所至有聲績豈偶然哉早禱而澍卒以勤死合於古祀法矣乃其臨歿而約束郡邑母令汙我爲也此何下結纓易簪哉蓋公之舉於先公也差殿而始按吳越先公屬大故築葬諸知名士咸自避晦削門下籍而公走使二百里而來以金叻繕墓不佞兄弟茲三辭而公三進之曰吾爲吾之師而已夫是以無虞於松楸而會先

帝賜詔洗雪公復從林中丞潤上書請予故御史大夫贈諡不報不佞兄弟以謝公公曰甚愧上書吾爲吾之師而已公之篤於倫理類如此

憲副張先生應治傳

王 俸

張應治字體徵號冲泉世居秀水之太平里洪武初
其祖張信山通名版籍厥後世以仁壽朴茂爲里中
白眉歷至曾祖正生世華華生用是爲封君寬厚仁
明人推爲長者少通儒術旣而棄去拮据家業舉三
丈夫子伯應潮季應濂俱庠生仲卽君也君生而姿
骨玉立修髯楚楚自初以穎異名讀書洪洞菴遇異
人一見目爲偉器甫十五爲弟子員逾年受知于今
宗伯松坡畢公進康食屢應棘閉志益刻勵嘉靖辛
酉遂領鄉薦將入對公車而行橐未充或告君以宿

通索之可壯行李君取賄曰家世寒素倖微一舉
何爲此急白封君封君欣然取宿券焚之明春成進
士初授行人兩奉勅往典楚鄒府祭葬事三賁

穆宗登極詔君典事之外無私交雖星軺數往一切
餽遺拒之不受故制詞有發雋賢科清修博雅宜勞
使職英譽交騰之語再晉南垣君方爲諸生時遇大
計議卽已慷慨論列知識有過舉輒赤頰相正嘗指
心謂余曰使異日酬知遇亦如此矣及授職知無不
言不阿權倖諸所獻替當寧彈射要塗者疏凡數十
上其最鉅者如請正宮闕除巨壻二事正宮闕

者當 穆皇帝時 皇后引疾避居別宮兩都洵洵
謂有他變君掀然冠髮上指急提筆草疏一夕而成
累累數百言皆鯁直激切人所不敢言者 上覽之
下 旨切責諸垣得相繼交章已而 鳳馭返正固
聖明之轉圜而君之力非眇小也除巨璫者聞都內
官監邢保憑城倚社實與馮保聲勢相藉侵尅匠工
銀三千餘金諸匠控訴無路君受命巡視遂更相憫
曰張公來覆盆睹天日矣紛沓陳告一朝而得狀四
百餘紙按實將發邢覺急緘金珠珍錯密遣唱君君
益怒趣疏上之邢輦背輪黨百計謀中君疏持數日

不下時華亭察君忠緩頰君言第發部議部以宦奸
當究言路宜申邪充淨軍一如君勘于時內豎憚君
風力莫不欽迹初疏未下時省僚有爲君危者君曰
言分也倘吾言得申大奸盡發卽獲譴談笑赴矣時
論以此壯君嗣是復屢劾當塗者俱稱 青朝例科
官三載稱職進京秩時以 聖壽蔭輔臣子君具言
非制評甚力又以新鄭拜相未協人望聯疏論列作
意竟除潯陽守潯陽軍民雜處君初視策衛軍以乏
餉三載脫巾呼噪君查 國初以潯陽安慶均重地
各有額糧萬石後以安慶被兵暫撤糧協濟相仍三

十年當事者重于改革君議復初制力陳數四上官
難之卒抗言曰天子命臣以專城之寄今撫安囂悍
直阻抑不行當自疏以去就爭耳臺院始上其議
天子嘉納衛劄得如初潯地衝民貧乘傳至者無虛
日支應者往往覆產君議條鞭于上官民困得甦府
治近江巨盜出沒君沿江創烽墩分兵戍之更設法
緝捕無一敢窺境者隆慶之季江右大侵流民相携
入境有議驅之者君說曰開流離襁負而至奈何棄
之卽令發廩以賑主者以未得請爲言君曰賑饑如
救焚必待請則往返間已成枯魚矣有咎獨我任之

可也隨至隨給莫不沾濡流民賴以全活者千數澤
士多貧首捐俸置義田若干以資饋粥月令博士校
執以間每從中次第之士彬彬興起成名者甚衆君
廉明方正率下有體僚屬以至五邑之長靡不廉廉
易慮性喜典籍簿書之暇日賦詩談枕有欲媚君者
藏金碑記中以獻君覺震怒不旋踵麾斥之人益憚
威名長史有稍自點者輒自投劾去廉公之聲日起
入觀邑請以例進君悉屏去曰古有兩袖朝天者焉
用例爲舟抵潤州輕舸詣家則跪請封君曰兒爲守
無狀無能爲道路資封君又欣然喜乃悉括其羨租

易八十金以行比大計廉能考最今 上面諭曰爾等皆好官朕都知道當益體朕心恪勉乃職令內臣擎金幣以賜又 命大官劉宴慰勞備至凡郡牧七人君第二遂超擢臨清憲副臨清當西北孔道軒蓋驛騷且迫邊徼赤白囊交馳君下車首簡部伍汰老弱修城築堡爲備密于溱陽州歲以兵戍邊率爲長守君心知其苦且慮兵力單弱以其衣糧饒裕諭令自輸其羨官爲補助添募丁壯四時番休往戍囑囑呼便而武勇由是益壯遂刊爲定例經畫數月稍稍就理而疾作矣先是守潯陽以多故綜理周悉夜分

不休比時脇下結一核矣行部未竣漸升漸大偶邂逅官齋指以告余余曰此奇疾也奈何君拊膺曰余非不知勞劇然業已委身奚遑自恤第獨老親在念耳相視泫然已而竟鞠躬盡瘁以死惜哉居恒恂恂出而蒞官則英爽勃發揮霍振厲體素癯有告以自愛者君微哂而已至問及廬畝則粲然投袂曰丈夫無纖毫報稱 國家營營爲馬牛計吾弗爲也故歷官司憲肅然故盧吁陌仍舊當易其時從容賦詩有去住不殊君親未報之句

無一言及私何止壯也

以仲直節殫素心爲售人以厚豐殖爲售片獨以守廉靜如去節爲售士固無慚余影耳售不計其

僉事

山東按察司僉事胡子義傳

忠節錄

胡子義一名志遠刑部侍郎子昭弟也薦辟爲威遠訓導歷府典寶山東按察僉事聞兄子昭死避世丹稜蜀獻王聞而憐之令削髮爲僧子義以親遺體辭有子二人生數歲子義曰吾兄無後天不絕吾姓二子當免於難竟棄去莫知所終

山東按察司僉事崔公碧墓志銘

薛瑄

山東按察僉事崔公卒于官將返葬故鄉其弟理奉公行狀請銘于其兄同官河東薛瑄謹按狀公諱碧字仲玉永平昌黎人大父彥名祖妣齊氏彥名有隱德鄉人嘗被兵無食彥名以其家積穀千餘石貸與之食兵息取券焚棄一無所責償父配母齊氏生四子長卽公次叔琮次叔璘次卽理少有美質大父母父母特愛之遺充縣庠弟子員習經史舉業中永樂十五年鄉試登辛丑進士第宣德初拜交趾道監

御史立事舉職強幹不屈籍籍有聲遠國家推恩例
封父得文林郎交趾道監察御史母齊氏封孺人時
公大父母俱高年安好無恙父母又皆顯受褒錫公
嘗衣繡歸省于家祖子孫三世一門壽慶光顯郡邦
以爲榮正統紀元調行在江西道監察御史明年爲
廷臣薦擢陞今職分巡部屬剔濯奸垢振筆紀綱事
以無墜竟積勞成疾以卒正統四年十二月二十三
日也享年四十有九矣先是公有疾因念本木人已
卒大父父母俱年老在故鄉不得朝夕見愈憂思不
置遣理往迎之既而大父泣御史君俱弗克來獨母

孺人至公輿疾迎郊外相持感泣不已疾遂增華公
初娶張氏早卒贈孺人再娶劉氏泰州同知浩之長
女封孺人公存日特命理之子善聚後已公沒理如
其命善聚甫四歲幼不任事理奉公柩歸以正統五
年四月初二日葬于故里司家庄鵲鳳山之先塋
銘曰胡豐其始胡嗇其終命實爲之嗟嗟乎崔公

山東按察司僉事李公彬傳

李 濂

李公彬字以中河南祥符人也祖延中積官至廣西
右布政使父謙 勅封文林郎行在山西道監察御
史公性峭直疾惡甚嚴持論慷慨耻浮沉詭隨永樂
癸卯領河南南鄉薦宣德庚戌登進士甲寅授行在山
西道監察御史正統戊午 命按兩淮鹽法 陛辭
上疏曰禮鹹濫寔天人互成或刮于地或風其水而
淮南鹺利定甲天下其部轉運司正佐官監守財賄
責任匪輕宜選廉正之士爲之臣茲行多方詢察有
貪黷實跡者必劾罷之乞 勅銓曹此後除補務求

佳士往充其員果有清節著聞一體擢用則人不厭
此官而嵯政修舉矣上從之由是諸嵯吏自度不爲
公所容者咸望風解印綬去壬戌勅清戎山西公
軍車入晉移檄軍司曰某嘗究軍旅空乏之由矣寔
因本管官尅削影射俾隸行伍者皆寡弱而役私門
者皆富健先是止提尺籍勾稽徒勞無益某今惟密
訪平素投托都指揮等官門下服役者罪之今代寡
弱者行伍其自首者宥隱蔽不俊者罰由是山西軍
旅填實無復收給役私門者癸亥丁內艱守制還丙
寅服闋改浙江道監察御史辰擢山東按察司僉

事三載當考績適巡按御史閔買 廷議借留代巡
按御史決囚景泰辛未入覲 闕下受 勅諭壬申
懇乞致仕歸天順甲申詔致仕五品以上官進階一
級授中順大夫成化戊子卒享年七十有三公嘗自
言曰吾自筮仕以來皆典憲臬謬以平反冤獄振厲
風節爲已任居官二十年未嘗有枉于法者此心敢
對天日云

論曰余聞李僉事仕宣德正統景泰間歷官內外臺
執憲繩違必行其志殆古之所謂剛者歟退休林樾
晦迹養高與參議趙公公璧郎中賈公從矩運司同

知蘇公士英別駕孟公至善布衣趙公仲晦爲詩社
友倡酬飲燕過從里閭茱萸酒絕無華靡縱侈之
風嗚呼前輩風流不可復見矣漫識于茲以示邑子

山東按察司公事劉公時教墓志銘

林俊

劉氏諱時教字用行別號素菴曾祖得賢元季避地
自平江徙內江之中江居焉傳友義傳鑑是爲公文
封承德郎刑部主事母曾封安人劉世德隱承德公
尤孝讓以栽植有家六子伯氏仲氏有仕階意尤獨
公平異責所必成公亦力取自副年二十五魁于鄉
又四年甲申第進士爲刑部主事轉員外郎又轉山
東按察司事分按東兗兗終訟積數百事逮數千人
就繫動數三歲公裁決決月而盡訟爲之衰濟南北

旱先期民請蠲租平糶藥疾食瘠招流而瘞殍力且
厯獻計巡撫以亟請于上得發米二十萬石銀四
萬五千兩錢五百五十餘萬民賴全活東人安公公
不東乎薄也甲午巡淄川疾作猶強歷數縣至長清
與還越七日不起年三十九察使王君琳提學楊君
檢其簡敝袍數襲俸遺無十金

僉事楊用章進傳

朱睦㮮

楊進字用章祥符人也成化十一年進士授丹徒知縣會中使如浙所至縛守令置舟中得賂始釋將至丹徒進選善泅水者二人令著耆老衣冠先馳以迎中使怒曰令安在汝敢來謁我邪令左右執之二人卽躍入江中潛遁去進徐至紹曰聞公驅二人溺死江中方今聖明之世法令森嚴如人命何中使懼禮謝而去雖歷他所亦不復放恣云牟都御史按部丹徒以索饌器不得誣以它事免官進奏辯得白擢南京監察御史郎中李諒以事謫靜寧知州持尚書

黎淳陰事率家人竊取公帑物淳不敢詰璉并劾罷
之給事中某等言事忤旨衆懼禍出巨測璉疏救之
曰諫官乃天子耳目若以盡職獲譴則天下事誰
復敢言者是陛下自塞其耳蔽其目也奏入上

悉宥之總制兩廣都御史秦紘劾安遠侯柳景不法
諸事勘實得旨景罷紘亦致仕璉奏曰景之罪既明
是紘之劾不謬也今俱免者何也且紘忠實有大畧
不宜損棄從之隨起紘爲戶部尚書璉又奏建宗忠
簡公祠於丹徒如岳忠武杭州故事給卒守墓春秋
祀饗上俱如

所請弘治七年山東按察使事以疾卒年四十一

山東按察司僉事張公嘉謨墓志銘

許宗魯

公張氏諱嘉謨字舜卿居城南因以自號其先成都人也高祖才甫任易州知州國初謫戍寧夏曾祖景春祖恕父翼中成化乙酉鄉試仕終山西岳陽縣知縣母李成化壬辰某月某日生公於岳陽比有知卽耽嗜筆研書史舉動穎異不類常兒弱冠爲寧夏衛學生耕讀自力志向遠到乃從故兵部尚書胡公汝鵬授尚書爲文奇駿弘治辛酉鄉試中式明年壬戌中進士錄皆刻其試文爲程時岳陽公夫婦老壽公

乃上書請終養得請歸也養備至人稱以孝時乃開
門授徒一時英髦多出講下正德丁卯岳陽公卒已
已服闋授兵部武選司主事公家食時稔知武選宿
弊事事躬自檢覈吏姦不售選人大快辛未盜起山
東侍郎陸公完督軍平勦公與主事王崇獻皆以才
畧贊戎務切官軍之東也日尾賊後行止視賊故賊
益猖獗功無所成公乃獻議陸公謂當出奇以趣其
鋒審勢以奪其氣若徒尾其後是驅賊以自戕也何
損於賊何益於民陸公定之會賊犯濰縣陸公以偏
師為公公提師行一月而按兵不進賊易公不為首

公其怠也卽夕疾行蹙大破賊斬首二千級賊遂奔河南不復犯山東矣是時從征諸將思公功奇公復慷慨談論不自秘由是謔作力請回部未幾陞車駕司員外郎癸酉蜀盜滋橫詔超兵部尚書彭公澤往征之彭公疏請公與行公告彭公曰蜀地險阻用兵爲難今王師西征賊心震恐勢必不支若順流而下則荆湖之憂方剷矣公若分兵屬僕由漢中取道以扼夔峽公以大兵取重慶以蹙賊則成擒矣彭公深然其策後卒奏功如公策凱旋陞山東按察司僉事兵備濟寧酬蜀功也已而沂州礦盜竊發

宗藩弗戢撫臣疏奏移公兵備沂州公持法厲禁無
避忌由是忤觸 藩邸赴愬十 朝丙子冬逮公下
詔獄在獄數月乃得白然竟由此罷去公既歸退
居城南別業事親牧子授徒力田如素士益二十年
不移初志嘉靖癸巳公偶爲詩書壁間云年來慵懶
謝交游日接庸醫扁鵲流可欺明朝更分手短橋新
柳雨聲秋人見之頗訝其無謂不數日臥病甫七日
卽不起凡得壽六十有二平生好書學篆隸行草各
得其妙詩文敏捷亦成一家之言所著雲巖集西行
詩藏于家

山東按察司僉事李君紀墓志銘

王九思

君李氏諱紀字維之興平人也少年神骨清聳入爲
學官弟子受尚書不數年學成舉成化丙午鄉試年
二十四矣其後五走禮部竟不第弘治壬戌以父母
老于是不得已謁選爲鹿邑知縣鹿邑城復于隍久
盜賊橫起竊府庫劫掠富民往往有之君至不兩月
先爲築城城完乃下令捕盜乃均徭役撫寒餓勸農
桑埋獄訟久之民安盜由此息矣乃旂學校課諸生
彬彬然考德問業克乎其有得焉久之教化行民俗

成歌頌興矣于是撫按及藩臬諸公咸謂邑小不盡
其才奏移祥符乃鹿邑之民亦北走乞匭未及至而
命下矣啟行之日民無老幼貴賤爭走攀送有泣下
者然自壬戌抵甲子涖政財兩年耳而民仰慕之深
至于正德己巳猶磨石書其德政爲去思之碑焉君
至祥符人見前令無能保終者咸爲君慮蓋縣附藩
省今日跨馬受約束于所轄少不可卽訶叱甚則鞭
朴之又送往迎來飲食常失節至于獄訟租賦之事
暮夜始據案舉燭丁卯漏下三二鼓以爲常此非大
有才氣鮮不仆者君于是先其大者急者職事當爲

者種種有緒矣掃門一錢不入久之猶夫受約束也
所轄者從而禮泡之加舉焉猶夫送往迎來也飲食
以時猶夫暮夜丁理公事也多暇與賢士大夫飲射
之若是者三年會武宗新卽位君亦政成于是北
上考課既歸之明年丁卯召入爲雲南道監察御史
戊辰春巡視通州諸倉未幾以父喪歸庚午閣瑾事
敗君以同鄉并左遷知縣大學士野亭劉公陳留人
也雅重君請于吏部得陳留云是時諸郡盜起守令
多棄城走獨陳留以君完今少保幸眷彭公總制兵
馬公君治行爲河南第一在陳留三年而癸酉秋擢

寧海知州在寧海一年化頑民擒巨盜威惠流海濱
矣撫按諸公又以郡小才不克盡奏移臨清南北要
衝送迎無虛日又鎮守太監兵備副使閹廠諸主事
供億繁費且盜賊後居民凋敝處之亦甚難也乃以
委君君出自祥符以其盤根錯節之餘舉手揮之卽
迎刃而解聲稱藉甚吏部兩以令事擬君不果踰三
年丙子以母喪歸喪畢稍遷前軍都督府經歷一年
擢山東按察僉事奉勅提督畿內屯田其地多權貴
侵漁小民君不顧一切繩之以法乃嘉靖壬午竟由
此起謗君乃投劾不待報徑歸君自曾祖彥才祖英

父書家世爲農至君以文學興在祥符績最得勅封
其父文林郎祥符知縣母樞母兩張孺人及配康孺
人皆贈封焉君入爲御史時瑾尚未顯用事甫一年
而君以憂歸予知之固未與識也比瑾敗或謂君無
故乃一御史祥符人爲舉子時君甚愛之乃號于衆
曰如李某與平字破不得遂有陳甯之役然夫久而
御史者婦酒不四十死無後而君蹤跡明官至大夫
壽享古稀子孫勃然興焉天道果何如也此亦足爲
以言者之戒

山東倉事榜卷王公燁傳

王 樵

公諱燁字韜孟世爲金壇人自少讀書卽以古人自
程度刻苦勵行舉南畿鄉試第二嘉靖乙未進士爲
吉安推官治獄明恕因事以禮義勸導兩爭者皆悅
服建昌缺守其同知篤甚不可近所司以公視其篆
曰彼得王某當有改王某得彼當益進歲滿遷給事
留省風采凝重雖同官亦畏憚之數言事皆剴直嘗
一蒙 寬旨而卒以犯大僚見擯落云嘉靖初 世
廟欲追崇所生張永嘉諸人以議禮合意驟見擢用
於是 上開庶稽古禮文之事並建 南北郊親耕

親黨諸禮繼舉則夏貴谿附贊爲多遂用張桂故事
自都給事中擢侍讀學士以至宗伯入閣中年上
開意禱祠之事謂可以永年則嚴嵩先意承順尤極
佞巧費宋乃宏之弟其妻與逆濠之妻兄弟也以不
結附逆濠頗得時譽而嗜利險側不下于嵩三人者
公皆首論之而其論嵩尤切并及其子世蕃時嵩之
姦未著而世蕃之惡人亦未盡知公在吉安蓋得之
先見而中其隱曲故嵩尤恨之未有以發叙遷山東
武定兵備僉事以任滿赴部踰限奪職舊格所無出
嵩言也遂著爲例公在山東嘗餽御史行部而副使

吳龍道病公入謁御史曰吳副使病甚危不可委之
下人非某往視不可遂辭御史而行至今東藩之僚
猶道之而服其義焉公事親孝然有弟惡於衆慈弗
可感嚴弗可繩竟以是鬱鬱成疾死仕宦有年貲產
不增於寒素時婚嫁葺廬多稱貸于人病時蕭然一
榻布被蔽體邑令因問疾見而深嗟重之近世講學
者競右陸左朱號爲於言語文字之外得直截根本
公弗爲動曰吾敢斷之曰皆放心臨終語人曰聖賢
無自是之學問古今無自用之豪傑同邑范楷子正
親喪三年不入妻室公禮敬之終身唐治時雍翹直

負氣公常下之公有讀書之室曰樗菴裕田馬公嘗
爲之樗菴銘身後學者哀其遺文曰樗菴先生集凡
若干卷行于世

趙按察勲傳

歐大任

公名勲字彞伯姓趙氏先世出宋支裔自金陵戍廣
今番禺人也少秀整頎碩長好學博通經史弱冠補
郡學諸生嘉靖戊子舉于鄉辛丑銓授江西瑞金令
瑞金爲贛小邑隣于閩之汀州使傳旁午供給繁苦
泰和安福勢豪多以寄庄優免土著民久患差役貧
不堪命公申請均絲始得蘇息節省浮費興起學校
瑞金素乏科名弟子員戴汝器公所授經也輒舉中
式龍南信豐饑莩載道委往賑濟存活者衆署他邑
事一如瑞金循良之聲出于他邑不啻若瑞金民矣

江西巡撫都御史張公岳巡按御史魏公謙吉交章薦之先是安遠有黃鄉賊洞路通閩廣萬山巖險征剿莫及賊葉氏世統其衆也屢設軍門毒給千夫長印使之羈束乙巳冬千夫長妻曾氏代夫主洞二十冲幼姪葉經糾衆剽掠提督南贛都御史虞公守愚奏征之官軍敗于賊殺一千戶一縣丞勢張甚於是兵備副使薛公甲謂虞公曰事迫矣非趙瑞金莫辦此賊幕府召問方畧公曰賊方銳戰必敗也今聞賊亦自困且厭其首亂者可往諭使自縛虞公壯而遣之遂挾四小隸單騎入洞初往賊猶未信列兵露刃

大道擁視公推誠慰撫曾氏相率跪服手縛葉經及
梗化肆掠者數十人以獻餘黨悉降公又諭曾氏曰
官軍征汝奏聞于朝今雖縛姪而二子不詣軍門何
以示效順曾氏卽出二子付公曰二豎子之命在公
矣公曰二子卽吾子也當是時諸邑聞瑞金縛賊且
得曾氏二子歡呼道路公以二子入軍門觀者萬人
無不稱快處公不待奏報卽以便宜赦曾氏二子送
郡學觀禮公再入洞築城寨設巡司而黃鄉賊無不
歡呼樂業者是役也不餉一軍不廢一矢百年通誅
一旦歸命非公籌畧豫定得其要領能不戰屈服耶

幕府奏功論賞虞公特疏薦焉丙午考最獲封父桂
如其官母梁氏妻鄧氏爲孺人蓋殊遇也其年適以
治行徵入丁未選授南京四川道監察御史暫覘內
守備太監守備國公不理細務惟人命賊情許兵馬
司引泉時漸不如制且役辦無名竊盜攀指最爲民
患公疏五事禁無名之差役革官司之借端罷竊盜
之工價嚴巡捕之考覈省引泉之煩勞世宗皇帝
下其奏南京守備諸司爲之歛戢武職犯法憲臣窮
治波及無辜幾至激變事聞覆議參鞫之懲其首惡
餘皆清治上俞允之壬子遷山東按察僉事巡東

充濟南二道執法詳明存心忠厚審錄獄囚決配者
卽遣之寃抑者免齊魯之間稱明決焉歲大饑人相
食巡視拯卽不遺餘力豫徽州邑告賑卽發不待報
可民賴以生者萬計採荒之策一如龍南信豐矣食
事三年所巡按巡鹽劉馮孫楊四御史前後論薦于
朝甲寅以憂歸遂家居不出公爲名令尹御史而按
察尤有聲五十懸車論者惜其位不究德云所著有
遺集五卷藏于家

外史氏曰余爲諸生時趙按察以御史歸見泰泉先
生先生方授余經離席立侍先生顧趙按察曰御史

好官須做好人趙按察盤辟伏對曰敬受教袁參議
者分宜氏姪也與趙按察有同官強之起曰君但行
外舅必能爲君地久次可中丞也趙按察謝曰君意
良厚第煙霞已癖夢不到長安陌矣夫趙按察砥礪
名節如此其得于泰泉先生者豈淺渺哉此可以觀
趙按察也已